


40595

黄山指南

黄海散人著

武進蔣維喬題



±915.001

4434

黃山指南緣起

余裹糧橐筆出入黃山窮軒轅之仙境考浮丘之軼事者於今三年僅而有就爲重修黃山志一書宏搜博引別類分門曰山水則竟委窮源條分縷析曰物產則奇珍異品註釋詳疏曰形勝則峯巖洞石湖海池泉源溪臺嶺鉅細靡遺而古蹟附焉曰建置則寺院禪林庵堂壇觀精舍亭蓬存廢具載而橋塔附焉曰人物則碩士巨公名僧仙道其高風逸韻足以增色林泉故網羅而狀其行誼焉曰藝文則詩歌遊記論跋贊銘其古調宏篇罔不作聲金石悉博採而編其次第焉至若靈異則載其地並註其時俾可徵之有信寺產則記其額並詳其號庶幾久而不湮又且延繪事專家臨山描寫繪成全山平面側面總圖各一幅並擇風景之尤者分畫一百四圖每圖採前人名句與景洽合者題於圖隙非特臥遊者得見本山面目卽登臨者先置黃岳真形於掌上則出入煙霧不至爲雲海所迷此外如入山路線標明道里古今詞翰盡列姓名以公歷朝之頒賜羣公所贈輸要皆與山有關均不忍任其湮沒自

知滄海遺珠終所免日與戚友孫君孳生讎校朝斯夕斯既切而復磋之既琢而復磨之意多一度之研求或減一分之譌舛而海內同志紛紛遺書催促爰先將形勝與建置中之存在者並附遊客須知入山路景本山異產道里風俗俱列其後冠各圖於簡端刺原委於卷首彙成上下兩卷命之曰黃山指南俾遊者攜作南針沿途按索不愈於導者所信口傳譌哉若欲得窺全豹則須俟山志完全告成付梓之期定當不遠聊以此告慰同志因書其緣起如此

中華民國十八年歲在己巳穀雨後三日黃海散人陳少峯識

黃山指南凡例

一皖南黃山爲吾國第一名勝處此萬山之中恆以指導無人欲遊者每感不便而裹足因思海外名山必有專書記載一切以爲遊客之導此黃山指南之所以作也

一拙修黃山志編輯三年共計一千餘頁現雖脫稿因距清康熙間所修之舊志中隔二百四十餘年不但全山勝蹟陳廢靡常卽二百四十年中的人物藝文搜集恐有挂漏故延待數月廣加採訪以期克臻完美茲先將黃山指南一書公諸當世

一黃山各名勝圖志書用繪畫指南用攝影何也因有諸名勝形如臺面非繪不能曲折盡致茲黃山指南用攝者以易於傳神耳至全山平面圖皆本年實地測繪者

一不佞學識淺隘率爾操觚彌自慚愧譌舛之處知所難免閱者倘能就所聞見貽

黃山指南 凡例

書指教得以隨時增訂則幸甚矣

602.2211
380
3



黃山指南目錄

緣起

凡例

目錄

卷上

黃山新圖

黃山歷史

黃山形勝

黃山建置

卷下

黃山異產

遊客須知

黃山指南 目錄

五



A 215487


黃山指南 目錄

遊客路程

入山沿路風景

黃山風俗


黃山前路線圖



先繪精細圖一幅溪源山水俱載印者以字多畫密不易傳摹却之茲復繪最簡單者前後兩幅略指路線而已前屬歙縣後屬太平縣其里數未載因書中有山內路程一目其餘缺載者尚多如按目搜索無不次第畢現

編者述

例 圖	
山峯	△ 路亭
山嶺	∩ 山洞
橋樑	∩ 奇處
道路	— 險處
村落	○ 奇松
寺院	□ 僧塔
廟基	■ 縣界



黃山後山路線圖


黃海散人肖像




康熙御題

黃海仙都

黃山勝境坊




寨西橋望雲門峯




清潭峯布水源




池 湯



紫 雲 庵



井 丹




峯 花 桃




亭 濤 聽




布 瀑 級 澗 羅 望 橋 龍 回




慈光寺大門




間峯兩雲紫石紫在峯蟻蝦



峯 蕊 蓮 望 坳 石 龍 蟠



五 老 上 天 都




普 門 禪 師 塔




天 門 坎




弘濟禪師塔




童子拜觀音



小 心 坡




橋 人 僊 天 線 一




迎 客 松




天 都 峯



院 殊 文



蓮 花 峯




鯊魚洞望百步雲梯




洞魚鰲峯魚鰲望梯雲步百




天 海 望 西 海 石 柱 峯 石 床 峯




井 晶 水




峯 丹 鍊







石 門 峯




丹 霞 峯



獅子峯清涼寺獅林精舍獅子




花生筆夢



清涼臺




清涼臺望石筍峯




始 信 峯



始 信 峯 頂 望 軒 轅 峯





面 背 峯 屏 玉




柏 鳳 鳳

寺 谷 雲







江 麗 田 之 墓




寺 固 福



九龍瀑布



洞 僊 神



洞 蓉 芙 嶺 蓉 芙




缸 油 潭 油





菴 谷 松



榜 觀 人 仙




洋 湖 菴




陳絮矩草堂前東望翠微峯



翠 微 寺




吊 橋 菴




關 嶺 湯



泉 絃 鳴





石 人 峯



黃山指南卷上

黃山歷史

黃海散人著

黃山舊名黟山當宣歙二郡界高三千七百餘丈東南屬徽州之歙縣廣袤各七十里西北屬宣州之太平縣地跨二邑古稱地跨休歙太三邑互五百里以四方山脚俱有浮丘容成仙蹟包括在內今以本山計唐天寶六年六月十七日勅改黃山按周書異記神仙傳云昔軒轅黃帝問道於廣成子受胎息於容成子吐納而穀神不死獲靈丹於浮丘公遂思超溟渤遊蓬萊乃告浮丘公曰願摠衣躬侍修煉浮丘公曰凡擇賢而師學必精奧棲隱勝地業則易成鍊金成丹必假於山水山秀水正則其藥乃靈唯江南黟山據得其中雲凝碧漢氣冠羣山神仙止焉地無輦辛境絕腥腐古木靈藥三冬不凋名花異菓四季皆有山高木茂可爲炭以成藥迸泉直瀉狀如飛布下有靈泉香美清溫冬夏無變若能齋心潔己沐浴其中飲之灌腸萬病皆

愈矣黃帝遂命駕與容成子浮丘公同遊此山得道上昇其山三十六峯三十六源二十四溪八巖十二洞其餘諸峯高二三百仞幡幢林立石室台溝泉潭頂級井池石岔湖缸梯塢不可悉數者猶多按郡國志云天目山高一萬八千丈而低於黃山者何也以天目近連浙江天台俯瞰滄海地勢傾下今宣歙之平地已與二山齊況此山有摩天扞日之高則浙東西宣歙以及江寧等郡之山竝是此山肢脈諸峯積石迥如削成烟嵐無際雷雨在下霞城洞室乳竇瀑布無峯不有萬籟俱寂之時往往聞峯上仙樂之聲林洞之下巖巒之上奇蹤異狀不可摸寫誠神仙之窟宅也

形勝

大峯 凡三十六峯

鍊丹峯近光明頂高八百仞相傳浮丘公鍊丹於頂經八甲子始成黃帝服七粒不藉雲霧昇空游戲石室內丹竈尙存峯前有曬藥台又有鍊丹台在文殊院後玉屏峯之上古稱鍊丹台下紫玉屏卽指此也

天都峯在文殊院之東西對蓮花峯東連鉢盂峯爲羣仙所都高九百仞健骨竦桀卓立天表峯頂忽平如掌中有石室嵌立可容百人坐列罍鼎屏牀几臼杵弈均屬天然石品傍有甘泉澗溢似玉膏石之上絡以千年壽藤綠天無色下結五色苔蘚厚二三尺許軟如綿茵擁碧沒身疑臥諸天佛座上也俯瞰空中靈氣排蕩都成風雨迢迢萬山盡竄伏烟莽中乍有乍無吳越山川直齊州九點耳傍有犀牛峯一名耕雲峯絕巔有松鼠跳天都之景焉

青鸞峯爲天都之輔高八百五十仞狀如青鸞蹲侍從仙洞對之儼若大臣端笏而立又若天女靚粧覲帝真奇觀也峯頂有石如羽士跌坐謂之仙人打坐

鉢盂峯在天都峯之東高八百五十仞峯腰與天都相連如在慈光雲谷兩寺觀之狀如覆鉢峯頂有兩潭相並中有虬松間之

紫石峯高六百仞在鉢盂峯之下與紫雲峯中隔蝦蟆如青蛙之伏花叢栩栩生動峯石純紫如玉

紫雲峯在紫石峯下高八百九十仞上爲蝦蟆峯下爲紫雲巖峯上時有紫雲籠之雲恆聚而偶不聚雲偶散而恆不散峯曰紫雲言恆也非峯之似雲也非色之爲紫也

清潭峯在逍遙亭對面高八百仞卽湯口入山首當之峯也峯上有清潭流水傾瀉高百丈下有布水源錦魚溪溪中嘗有錦鱗魚游泳

桃花峯上連雲門峯下至祥符寺高八百仞昔有桃花千樹相傳黃帝所栽夏初始盛開謝時落紅滿溪故溪源皆由桃花而得名近則寥若晨星矣

雲門峯一名剪刀峯在湯嶺之西高八百八十仞門向南北開闢湯嶺屬東故雖近不得見峯之巔歧爲兩峯雙峯巉削相距不遠雲氣常從中梭穿過在山視雲爲無心之物在人視雲爲出入之門雲門標義庶幾灼然乎

浮丘峯又名轎頂峯俗呼箬帽尖在山之西峯高七百仞東與雲門峯只隔一源峯頂有浮丘公仙蹟下有浮丘觀故址峯北太平縣浮丘坦距山七十里乃浮丘公常遊之所

雲際峯與雲門峯對峙爭雄高八百五十仞在湯嶺之東容成峯之西濃雲濁浪障蔽千山獨茲峯一尖遙標雲外矯矯子子不在欲浮欲沉之中

聖泉峯在蓮蕊峯下高七百七十仞上下大中小狀如腰鼓絕頂有湯池於隣峯觀之勢甚騰沸從東南透迤而下流入湯泉源白雲溪按周書異記浮丘公謂黃帝曰黟山中峯之頂有湯池水味甘美可以鍊丹煑石蓋指此

硃砂峯在慈光寺後山高九百仞峯北至龍蟠坡純骨無膚宛若削成山色如硃砂石泐中間生蒼松丹翠交織亭午日光映之采色絢目是山也而彝鼎之矣是石

也而錦綺之矣

蓮花峯在文殊院之西東對天都高九百仞石蕊中尊千葉簇簇如瓣環峙諸山皆及肩而止無敢爭高者而徑尤窈窕遊人緣莖而升穿孔而出紆迴盤曲計循四洞始達峯巔絕壑懸崖下臨無地右望江水甚廣左望海氣甚黑

容成峯一名容溪峯高九百仞左連鼇魚峯右近雲際峯峯形如鐘俗呼鐘峯相傳容成子常遊息於此峯南歙縣容溪距山七十里有容成台古跡乃容成子跌坐之所

石人峯高七百仞在容成峯之西近白雲菴峯形雖小勢極險峻絕頂有石如人振衣屹立

石柱峯在天海西阜峯上連平天砭高七百九十仞亭亭獨上刺日撐霄其形儼如天幹

松林峯在平天砭西北高七百仞北連丹霞峯山頂多產蒼松無它樹按松史記曰松百木長也而守宮闕其材小者椽大者棟千年則子黃味似粟分其氣於他處

生芩其脂一名曰肪黃山松以石爲母以鐵爲幹以針爲鬚以苔爲鱗以矰以瘦以偃蓋爲古雖松不可以常松測

石牀峯在天海極西之峯北連雲外高八百五十仞上有石牀橫陳如白玉琢成其平如砥行住坐皆宜不止臥得也又有紫石牀三碧石枕三相傳爲容成浮丘二子侍帝寢息之所下有石室深十餘丈俗呼觀音崖上有西海觀音打坐石

雲外峯在丹霞峯之西中隔西海高九百仞南連石牀峯峯之上多杜鵑花雲海鋪時衆峯俱沒獨此峯浮出雲外或云峯在山西盡境遊人多睠天都蓮花往往遺此因得遂其雲外散逸不受人間顧問亦一義也

丹霞峯在松林峯之北高八百九十仞爲獅子峯之西障峯上有石人如置身烟波上俗呼達摩渡江峯壁悉赭色若紅雲之麗天上亦有石室

石門峯山之中峯高八百八十仞上爲光明頂下爲碁石峯兩壁夾峙如門如倚門東望何異登天堂而視下界溪出門下若水關焉

碁石峯在白鵝嶺之南高八百仞南連石門峯北連貢陽山東爲石門源西爲平天

砥至獅子峯道路俗傳浮丘公與黃帝對弈之所境最幽奇

獅子峯爲後海鎖鑰高五百仞面對貢陽山首大於趾龐然雄踞有拉虎吞貔之勢
峯腰築廟爲正頂清涼寺峯之東傍爲清涼台卽古之法台也

仙人峯在散花塢高八百六十仞相傳浮丘公與黃帝遊此島間遇仙幻石狀如人
有坐有立冠服儼然峯下石壁高五百餘仞巉削無階猿鼯喪其捷巧峯之南脰
曰關公擋曹上則氣概雄威下則形狀狼狽

上昇峯高八百仞東爲石筍峯西爲始信峯峯由溪矗立形若寶塔旁無所依下無
所藉渣滓淘盡祇存勁骨昔有阮翁於此上昇故名峯常爲雲所擁浮浮沉沉無
定形遠望勢若上舉故曰上昇也峯上往往聞鈞天之奏似遠而近似近而遠聽
之者曰天樂來矣天樂來矣山中人質稱之則曰阮峯

仙都峯在丞相東源之上高八百仞按神仙補闕傳黟山北峯是神仙遊處時有形
雲擁護白鶴飛翔卽指此也

軒轅峯在望仙峯之東高八百九十仞南爲仙都峯下距神仙洞十里峯頂有石室

有石座有石几相傳黃帝受胎息於容成之所或曰斥帝諱以名峯其人草野其
失不學矣雖然此特泥古者之言耳方今外國固有因其人之名而名其地者何
嘗非一國元首乎是以軒轅名峯不得斥爲草野矣

望仙峯在山之北峯高八百五十仞北連五老峯爲太平縣治祖山按周書異記黃
帝容成浮丘於湯池見珠函玉壺持歸中峯石室飲甘露瓊漿披霞衣簪寶冠躡
珠履光輝山谷須臾黃帝乘飛龍前引綵幢珠蓋三仙飄然從峯頂上昇山下人
望之聞彩雲中有絃歌聲故其峯左右二處稱望仙竝歌二鄉焉

布水峯在軒轅峯之東高七百八十仞布水飄曳如練高出雲端天晴雲卷峯隱萬
峯中孰從辨覩於是知布水峯之奇奇以雲

疊障峯在松谷菴後高八百仞層霞疊玉如猛風吹紋聚皺成疊如展如屏望之若
元后當宇而立

翠微峯在雲外峯之西高八百五十仞嵐碧到地松青到天上一色凡山椒皆以
翠微名茲以名峯者椒從同峯從獨

九龍峯近芙蓉峯高八百仞一峯也曷言爲九龍記見也視之則峯察之則龍合而言之則九龍山通體一巒耳纏糾蜿蜒於九龍知山之靈於飛龍悟山之動從三海門可窺峯下石廩石田蓋依稀見之

芙蓉峯在芙蓉嶺之南高七百五十仞東連磨盤峯西爲探頭峯輔村視爲筆架者卽此峯也龍從峭拔青天削出芙蓉惟此峯足當之

飛龍峯在芙蓉嶺之東高八百七十仞峯之形如龍其騰翥則飛曰飛龍儼似耳山川出雲烏知塊然凝然者之不爲龍歟

采石峯近飛龍峯高六百仞下多色石如玉陰暗之夜卽見相傳有羽士嘗糞食之布水自峯飛下雨後澎湃如雷

小峯 凡三十六峯

鼈魚峯在鼈魚洞上形如巨鼈若在天砥南眺卽俗所謂鼈魚它金龜是也

蓮蕊峯在蓮花峯南宛如菡萏含苞奇峭不可登上有石如艇呼爲採蓮船又稱洪

船出海旁有雞形背蕊面花曰金雞採玉蓮均各秀麗奇妙

牛鼻峯在蓮花峯下鼻而刺天

玉屏峯有二一在文殊院一在松山寺文殊院則擁護其後松山寺則嶂列於前峭然壁立狀若植屏

耕雲峯一名犀牛峯傍天都峯而立巔有石鼠伸頸豎尾有躍躍欲上天都之勢俗呼松鼠跳天都卽此峯之頂

老人峯有四一在天都峯下有五石如人肩摩踵接面向天都曰五老上天都前有石人偃僕扶筇若爲鄉導者卽老人峯也一在緊淺盃對山一在望仙峯下又硃砂峯北有長矮兩石長石如人亦稱老人峯

蝦蟆峯在紫雲紫石兩峯界中如蟾欲跳栩栩生動

眉毛峯在丞相源右山上連鉢盂峯弱柳新月峯象似之

佛掌峯在天都峯背左由白鵝嶺下丞相源遙眺有五石嵯峨宛如伸指者卽此峯也

香爐峯在丞相源雲谷寺下轟然鼎立宛案間之寶鴨焉

青蛙峯在石門源挺出一石巔類蟾蜍青翠可挹

合掌峯在石門源近皮篷間狀如膜拜

面壁峯一名板壁在白鵝嶺東下面向壁行又名白鵝峯以嶺得名

石筍峯在上昇峯東瑤簦森秀逼肖筍形下有砭如峯名

始信峯在石筍砭散花塢之西南三面臨壑背北面南從絕壑凸起與東南一峯中

隔丈許闊三尺下臨無地架石爲梁可至峯腰左垂翳一松藉枝扶手度橋卽入

石圻窄僅容身過前去十數步攀級而上卽至峯頂頂平如掌明季僧一乘築室

於此名曰定空江節愍書寒江子獨坐五字於扉清初汪名士洪度易爲始信草

堂偕弟隱此乾隆末季江麗田先生訪此鼓琴近稱琴台是也黃太史習遠韓太

史廷秀崔公使國因傅督學增湘先後皆有題句峯巒奇秀無逾於此按始信者

謂從丞相源至此而始信其奇也

石鼓峯在獅子峯西南上爲西海口下爲鐵線潭峯形圓矮如鼓又謂峯有石鼓擊

之其聲淵淵

薄刀峯在光明頂下形如廚刀豎立

駝背峯在獅子峯北

觀音峯在散花塢中宛如大士飄海立於蓮花之上

雞公峯在獅子嶺北下有振冠展翼伸頸欲啼之態

書箱峯與藥箱廚相連近上劉門亭觀之則箱屨備具狀若抽動

寶塔峯在中劉門亭之上由松谷菴至獅子峯須繞此峯而上浮屠矗立天然之舍

利也

轎頂峯有二浮丘峯俗呼轎頂此轎頂在松谷道中卽下劉門亭對面

五老峯在望仙峯下

檻窗峯在寨門源上峯畔有竇如窗可透隔山天光

夫子峯在神仙洞之北一名夫子尖南連神仙洞北連大戰嶺東爲碧山胡家西爲

夫子山脚峯下有洞大小七八處西邊大洞高丈餘圓如半月廣約二丈可聚百

人峯東有太白書院故址

臥雲峯常爲雲罩隱現黶黶之間

枕頭峯在松谷菴對面山外遊人枕之或見羲皇入夢乎

一品峯近望仙峯狀如品字

道人峯又名道人尖由玉屏峯中松山寺出過繞村嶺而起下列大寺岡

醉翁峯在玉屏峯西峯下爲溝村舊名黃泥尖醉翁至此宜其意不在酒也侍御崔

涯有詩

引針峯在芙蓉峯下黛鎖翠環猶黃山膚廓峯頂碎石能引針

磨盤峯與芙蓉峯相連東高爲磨盤西低爲芙蓉又爲探頭峯輔村南望狀如筆架

者卽此處也俗稱有磨盤精藏此豈其然乎

羅漢峯在丞相源雲谷寺之左峯多奇松狀若羅漢

筆峯在散花隔一石挺出平空聳立下圓上銳其狀如筆松貫頂生覆垂而繞之又

名夢筆生花西有一峯五石錯出狀如筆架何天造地設如此之巧合耶

探頭峯在芙蓉峯之西頭角崢嶸

源 凡三十六源

鍊丹源在鍊丹峯丹臺之下鍊丹水出焉飲之令人壽

香谷源在天都峯下時聞異香馥郁不辨蘅薇蘭蕙之屬

採藥源在青鸞峯下山涯水滸藥草生焉相傳爲黃帝採藥處

湯泉源在紫石峯下源水流入湯泉溪

丞相源在鉢盂峯下一名擲鉢源深三十餘里相傳爲宋丞相營菟裘處或云陶學

士石刻尙存源之左隴俗呼丞相東源

桃花源在桃花峯下從源遡而上石潭如釜爲藥銚上一潭豐首銳體爲藥瓢又巨

石東流如矢望瓢中的卽藥溪

硃砂源在硃砂峯下源深莫測惟聞水聲潺潺然汪榮和曾窮其源不能至

香林源在獅子峯下源中嘉樹林立時發芬烈之氣山中古木屑之皆香殆不啻梅

檀者

蓮花源在蓮花峯下水流入蓮花溝下白雲溪

白鹿源在石人峯下昔有鹿毛白勝雪獵之莫能獲

乳水源在雲際峯下味甘如乳下有布水流入白雲溪

陰坑源在疊障峯下終古不見日景涼風肅肅凌人炎酷時有三秋氣候

五雲源在浮丘峯下相傳浮丘公於此時乘五色雲遊戲

紫煙源在容成峯下常有紫烟籠罩相傳容成子常遊息源中故多遺跡如百步雲

梯鼇魚洞諸名勝俱在源上

紫芝源在軒轅峯下按周書異記黃帝曾於源中採紫芝服食今尙有之

浮丘源在仙人峯下峭壁巖巖上有柎下有琴按柎葉似杏而尖材可爲弓弩琴則

甘草或云似地黃

阮公源在上昇峯下近始信峯

布水源在清潭峯下水從此噴出奔射如布枕流漱石之客至此苦喧不苦寂矣

翠微源在翠微峯下僻澗高懸水清而碧

仙都源在仙都峯下

龍鬚源在望仙峯下源中產龍鬚草長者可織席

九龍源在九龍峯下險同蟻室雖朗晨霽午常有山雨欲來之勢

甘泉源在聖泉峯下淙淙然如奏笙筑酌之泉味甘美側生靈草茸茸然如鋪繡綺

石門源在碁石峯下石岬如門一徑坦坦爲鸞車鶴馭往來出入之所上接青霄重

關天險水從門下出因以名之

碁石源亦在碁石峯下採藥人往往聞碁聲持柯者庶幾一遇之

石壁源在石柱峯下中有石壁峭立石液盈盈四時不竭

雲門源在雲門峯下雲水蒼茫惟聞潺湲之聲

百藥源在布水峯西下異草奇花徧上源上曰百藥者舉成數也採藥者惟擇其辨者采之耳

石室源在石牀峯下室深十餘丈簷溜屋漏其聲丁東寄語死心學道者無爲青山

白雲所待

紅朮源在丹霞峯下遍源生紅朮陰陽結氣服之長生

杏花源在雲外峯下春雨夕陽日邊雲際景源似之若長安道上則仙塵異路矣

黃連源在松林峯下源中多產黃連

柏木源在紫雲峯下源中多古柏嫩綠撐天濃陰覆地丞相祠堂不足擬之人行柏

中子落丁丁然近源人家爲室爲器爲薪皆柏也而柏不減其多豈玉衡之精獨

鍾此地耶

白馬源在芙蓉峯下相傳黃帝常乘白馬遊行於此源南有馬蹄石

百花源在飛龍峯下奇葩異萼多爲羣芳譜所未載昔人詠野花詩有食客三千皆

失姓古詩十九不知名二語可爲此源寫照

白龍源在采石峯下有瀑自上飛下如素虬吸海其聲砰礮遠聞源外

洗藥溪在鍊丹峰下藥白石杵儼然尙存又丹井上之桃花溪山僧亦稱洗藥溪姑並載之

香泉溪在天都峯下東溝中溝合流之處謂之香泉白石齒齒搏擊有聲水香愈浮石色愈麗

湯泉溪在紫石峯下按歙州圖經黟山東峯下香泉溪中有湯泉

桃花溪在桃花峯下世傳桃花爲黃帝所植花謝時片片飄落溪中如霞光電彩下注湯溪上泄蓮花硃砂白雲陰阮諸水雨漲則浪泛濤奔晴久則粉渟脂蓄不知武陵源中視此當何如也

硃砂溪在硃砂峯下水東流合桃花溪入湯泉溪

白雲溪在雲際峯下水東流入桃花溪

浮丘溪在浮丘峯下俗名浮溪溪中寥廓無際澗穿兩山之腹古有老梅糾結石罅間約十里春夏之交始花梅之大如巨桃惟無敢入採之者落壅溪中聽其潰爛而已溪水東南流六十八里與曹溪合出容溪下徽州府河西橋

曹公溪在黃山之東腋左皂莢嶺右雙嶺曹公乃三國時人於此仙去因以名之今

俗呼曹溪

容成溪源出容成峯下俗名容溪溪去峯七十里上有容成台行人過此臨流弔古

有超然塵世之思

紫雲溪在軒轅峯下常有紫雲空浮水面不散舊傳有釀酒道士在此仙去

阮公溪在山之西古無名稱因阮公常由上昇峯至此遊息遂得名近黟縣界二十

里在浮丘峯西

逍遙溪一名錦魚溪在清潭峯下有三源合流溪下多潭上多洞洞色或白或綠或

紫潭形或曲或方或圓就石置足爲涂雀躍蝠旋狼顧猿接不一狀溪中水石障

之擇罅磬折參伍而後去初溪口尙有人家因畏虎遠徙以故寂無人跡焉聞有

探源至七八里者日暮路迷羣坐石上見數處火光燭天大恐攀援踰山十餘里

乃達石筍砭

青牛溪在翠微峯下昔人於此逐青牛入水不見按漢書及玄中記乃青牛千年樹

精

弦歌溪在望仙峯下溪中時有步虛聲與溪聲相應多有聞之者

九龍溪在九龍峯下溪流曲折如神龍之夭矯

石門溪在石門峯下其水流入丞相東源

雲門溪在雲門峯下溪水從二峯中流東南下白雲溪東北下吊橋河西北下浮容

河泥鰍缸

甘泉溪亦在雲門峯東北近吊橋水極清冽掬而飲之甚甘

紅泉溪在布水峯下溪水泛紅色按謝靈運賦訊丹砂於紅泉似有紅泉處卽產丹砂

丹霞溪在丹霞峯下時有落霞隨水流出

榆花溪在紫雲峯下溪多榆故名水流入湯泉溪口每當春季輒見青蚨疊疊隨波而下

飛泉溪泉出高原激迸於石散爲大珠小珠飛灑入溪溪光因泉而碎人立其上搖

搖閃閃不得澄觀

松林溪在松林峯下凡峯麓多溪溪從乎峯也松林峯巉不可登則峯之松杳不可撫惟欲聽松濤者莫善於此溪

白龍溪溪水明瑩若貯冰壺山光樹影咸攝入水中是溪之能也沈於上不見於下謂之濁沈於上畢見於下謂之清清豈溪之能哉

洞 凡三十四洞內古洞十二

水簾洞在桃花峯腰嵌湯寺右厓上深三丈高二尋廣七尺而儉石色黑白相雜瑩潔如玉登山三里許亂石曲折峭壁橫立水縷縷如簾右轉逕窮石梯天成攀梯里許抵洞洞盡有子洞如龕若彼堂此奧洞外一水下注冬夏不竭出洞左折懸巖乳垂摩壁行十餘步復有二小洞中隔如堵牆爲餐霞洞三洞正面天都諸峯軒轅碑在洞右

打鼓洞在中溝西岸路下擊之有鼓聲

硃砂洞在硃砂峯下洞如仰盂泉盈時有丹砂湧出

飛來洞在中溝西岸慈光寺往文殊院道中洞石四無依附宛若天外來者

雲巢洞在小心坡下釋稱真如關洞名爲曹太史鉛所鑿

普賢洞昔爲普賢所居在文殊院仙人橋下洞上清泉下瀉洞前石筍上鑿石磨石

臼研槽刀砧一一具備

臥龍洞在蒲團石上昔有古松橫生洞上如龍之偃臥也

一線洞天原名一線天在仙人橋上兩壁界立中開仄徑光線注射直上雲霄

轉身洞有二一在文殊院下一在神仙洞下文殊院之轉身洞俗稱羅漢洞又名文

殊洞其洞螺旋而上深黑且溼似轉身之名較爲切當

蓮花洞在蓮花峯下洞方廣三丈許洞右一峽聳出洞巔級而升前一峯突立如植

圭正當洞門頂如二指形名曰搯月巖旁一樹對峯朝拱如翼衛然又峯上四洞

螺旋蚓曲卽達峯巔亦稱蓮花莖洞

鼇魚洞在鼇魚峯脰高巖峻壁中開三角竇宛如鑿成穿洞口而上若久祕帳中揭

之而出西折登巔則天空地闊一望無涯所稱天海者是也

鼈隴洞在西海門下上有釣魚石下有螃蟹石洞口高不及三尺愈進愈高能藏數

十人在西海採藥者往往裹糧住此避秦者何必桃源也

容成洞在容成峯下相傳容成子所棲上昇之後奧府猶存寶篆丹書無敢捫讀

錦霞洞在獅子峯下時有錦霞密布日光穿射輒成異彩

狼豹洞在石門峯下一名蒼豹宋時有蒼豹棲此按泰山多赤豹幽都之山有玄豹

屠州有黑豹白豹古未聞有蒼豹者有之自此洞始

仙燈洞又名仙僧洞在仙都峯下與鉢孟峯東西相向中隔丞相源距雲谷寺四里

洞長形高九尺寬三尺深二丈五尺有奇洞畔有圓池廣袤尺餘池水甘冷四時

不涸洞口竹木茶柯皆山僧所植方外居此成道者代不乏人陰暗之夜洞口有

燈朗朗如星月人呼爲聖燈

夫子洞在夫子峯下高丈餘圓如半月廣約三丈光明軒廠頗可迴翔洞中東隅有

一小洞高二丈餘寬僅尺許

黃絲洞在黃絲境屋後一名石屋寬三丈深半之幽雅有致

吊棺洞在譚家橋下雖由人力而成亦千年古蹟也詳載太平縣志

仙道洞在神仙洞下道旁昔有道士在此胎息羽化登仙

挾身洞在神仙洞右旁上連下分裂縫數寸遊人過此衣擦壁索索有聲

神仙洞卽仙人洞內祀觀世音又名觀音崖在軒轅峯脰距福固寺五里額鐫簡默

洞天四字相傳容成子所題洞寬八尺深五丈前高六尺後高二丈觀音座後有

池石液盈盈名爲流杯求子女者以手探池中各摸石一枚長者兆男圓者兆女

輒有奇驗右隅有小竇不能入陰風透出冬溫夏涼右壁上斜穿大竇圓如滿月

透洩天光不啻濯魄冰壺下設木梯得遵數級再捫石登足窠蟻行丈餘始達竇

口竇外尙突石如階可依竇口立身遙望九華大通均在西北落照間也

半邊洞又名半邊石屋在芙蓉嶺北下路西旁距嶺四里廣約八尺頗堪容膝棲真

者常居之

芙蓉洞在芙蓉嶺上洞額請觀二字乃康熙念年間太平縣知縣陳九陞題

百花洞在飛龍峯下洞前多異草宋石應孫有詩

九龍洞在九龍峯下洞因峯名有穴無路惟獺狻始得而至焉

弦歌洞在望仙峯下洞中嘗聞弦歌之聲

翠微洞又名麻衣洞在翠微峯下爲隱士念一舊居今無人矣

天星洞有二一在湯嶺北下乾坑橋西岡一在松谷菴上仙人觀榜東壁皆一壁中

空炯如天星與眼相射可透隔山天光

德圓洞在栗溪坦往伏牛嶺途中上山二里處光緒初僧德圓卓錫於此三易寒暑

山民以洞師呼之因以名其洞

駕鶴洞在石人峯下相傳爲浮丘公駕鶴處

藏雲洞在雲際峯下遠望洞口常蔽黶黶中遊者至此多迷惘不得入

獅子洞近慈光寺東溝之普同塔巨腦虬尾形如獅蹲故名

仙人洞在岡村近大溪橋深廣八尺擊之作鐘鼓聲或以火炮轟之淵淵然半日不

絕

巖 凡三十二巖內古巖八

紫雲巖在紫雲峯下卽紫雲菴大殿後巖名爲程部郎振甲所鑄

佛掌巖從慈光寺普同塔進里許有石指三四簇出巖端儼若如來舉金色臂舒光

明拳雲間顧諱題曰佛掌普賢洞旁一巖亦稱佛掌

硃砂巖在硃砂峯半壁內產丹砂逕斷壁懸人不能到按神仙補闕傳浮丘公黃帝

同取砂鍊丹卽在此也

華蓋巖巖前可望硃砂洞巖觀洞洞亦觀巖巖之奇較遜於洞故洞常爲巖所觀

觀音巖在老人峯道中石黧暗古樸與硃砂洞遙對顧名思義不可得豈法華經偈

云諸佛滅度已乃至童子戲聚沙爲佛塔皆已成佛道茲巖卽謂之大士化身也

亦宜又石床峯南脰有巖亦曰觀音

月脇巖在趙州菴左畔

指月巖在蓮花洞上聳峙凌空有樹如蓋

猿猴巖在石門峯下峯傍時有羣猿交股連臂下飲於澗或攀藤木嗥嘯不常人從樹下行不相惶怖則已稍取木石擊之輒遭其侮禦以火藥或舉火燒烟薰之始逸去巖乃其窟穴故名

法水巖在大悲頂

石榴巖在松林峯下巖上榴樹甚奇古數十年一實子如花色其味甘於常榴將隱巖在獅子林從絕頂南下見巖前二石如寒山拾得欲避閭丘之頂禮將入石縫而未開合時黃太史習遠以將隱名之

爛柯巖從獅子峯前遙見巖上二石如二人對弈石枰方正弈子楚楚惜旁無觀弈者名曰爛柯似未得當欲以對弈易之

阮公巖在上昇峯下相傳阮公修鍊處

龍鬚巖在望仙峯下黃帝乘龍從峯頂上昇羣臣攀龍鬚墮地化成龍鬚草巖上今猶生之

毛人巖在軒轅峯下昔有樵夫墮巖食黃精得不死日久遍體生毛後有故人遇之

巖下與言鑿鑿招之歸不顧攀巖而去

和雲巖在望仙峯東之盡處距太平縣南鄉感梓里五里巖高五百仞上名火龍尖
遙望長江如練稍下石崖橫亘數十丈常作丹碧色嵐中有梵宇精舍傍有虎壘

龍潭旱時禱雨甚驗

慶雲巖在夫子峯下與天馬山相遙峙松竹環翠山徑紆曲

九龍巖在九龍峯下峭壁頽巖欲墮不墮欲仆不仆前臨深澗不可丈尺仰矚俯視
令人心魄俱冷

石乳巖在疊障峯下巖中多石乳凝膏下垂餌之可以延年俗呼爲滴水巖

白龍巖在采石峯下石色純白橫亘如龍

虎頭巖怪石昂首蹲道如虎在白雲溪旁左又名山君巖似不如虎頭爲質實
轉身巖在文殊院西下

大士巖近轉身巖巖上有大士巖三字波磔蒼古不知爲何人所書

石室 凡五室

天都鍊丹軒轅丹霞石牀五峯皆有石室惟天都最奇

圖經云軒轅峯下有石室卽黃帝遊息之所曾有樵翁入室中見一道士釀酒爲設一杯翁曰天性不飲至夜又彈琴說之翁乞寓宿道士不許送出洞口忽墮巖下變爲毛人今室中石鼎石砧剉藥刀痕猶存卽黃帝遺跡焉

臺 凡九臺

鄭公釣臺在小補橋上溪中鄭公名師山元至正間隱居祥符寺常垂釣於此

鍊丹臺從鍊丹峯下行數百武石皆紫色平舒曠衍可容萬人自右稍降俯深壑乃鍊丹源也羣峯咸從源中崛起仰視天都蓮花諸峯如浮屠對峙臺前一小峯名紫玉屏巋然端拱宛如几案間物鐘鼎餘峯視此皆側立矣黃山峯多以峭削勝臺獨平曠可喜曬藥臺載鍊丹峯

文殊臺在文殊院前相傳文殊跏趺成道處昔院久湮沒僧普門夢文殊現身端坐
石臺後至此處正與夢境符合因於臺後重建院宇故又名夢像臺

立雪臺在文殊院右臺畔有石如鶴

清涼臺原名誦法臺又曰法臺石在獅子峯由獅子嶺西折而上臺方正平削縱橫

丈許臺側一松破石而出名破石松枝幹雖枯尙能扶手民國九年傅總長增湘

題詩於上臺之北境晴空寥闊一覽無餘

望仙臺在獅子峯清涼頂後岡上登臺望太平望仙鄉全收眼底

琴臺一在始信峯定空室一在丞相源龍鳳菴皆乾隆末季江麗田鼓琴之所

釣月臺在丞相源龍鳳菴臺側上剝有月歲讀書處數字剝蝕多不可辨

容成臺在容成溪近黃山谷口處

溝 凡五溝

蓮花溝在蓮花峯下其水出虎頭橋入白雲溪

桃花溝在桃花峯山上通桃花溪雨後澎湃如白練高挂

八溝由雲門峯至桃花峯古劃八溝每溝秀異若經鬼斧

東溝在天都峯傍南下至羅漢級與中溝合流而下回龍橋

中溝在天門坎南下由慈光寺赴文殊院必沿此溝而上溝與溪無異姑從舊稱

泉 凡十六泉

百丈泉在湯口至湯泉之適中處距兩端各四里許幽篁古杉迤邐蒼鬱

飛雨泉從湯寺遙望山間如散珠濺玉飄瀟空際

法眼泉在慈光寺可供千鉢有片石當之若交睫者曰闔石是則法眼殆常合而不

欲一開歟

硃砂泉在硃砂峯下相傳軒轅嘗取此泉水以鍊丹

勝水泉在蓮花峯脰微有泉脈僧惟安疏泉成池吳趨朱鷺取經勝蓮義題以勝水

千秋泉泉甚清澈

丹泉在鍊丹峯仙石橋畔水無定形無定色亦無定名在佛爲法在仙爲丹飲之者果能知味謂泉可謂丹可卽謂一滴水具四大海亦可

澡瓶泉在石門峯半壁有石瓶狀如杓柄中有流泉出焉

三昧泉近天海菴其水清且漣漪

天眼泉在獅子峯小泉滴瀝雖亢沴不竭其味甘

秋泉在石筍缸左壑右臺下天成二小池可留水三四斗不事甃治奈書升於立秋

日遊此見之因名秋泉

錫杖泉在鉢盂峯下劉宋時有一僧來建新羅菴以錫卓得水又傳雲谷寺供堂前之靈錫泉昔爲東國神僧卓錫湧出

瀑布泉在雲門峯下石林雲起匹練長垂遊人望樹頭百尺大聲出其間者瀑布泉也立其下耳爲之震語不得聞

落星泉從停雪石入谷行半里有泉潏然勢如遊龍水光四射注石而成坎者三盈科復下衝激而成坎者五卽今之鳴絃澗澗著而泉隱人知有澗而不知有泉也

特表出之

鳴絃泉由虎頭巖上行二里許至鳴絃橋橋上有石若舸壁崖橫疊長三丈高五丈狀如琴中空豐左殺右泉從絕壑拂琴上裊裊有聲冬寒結冰時琉璃滿壁俗呼珍珠挂門簾是也琴石上有鳴絃泉三大字又洗杯泉三小字皆李青蓮遺筆也聖水泉自湯寺溯洄桃花溪一里可至又二里爲鳴絃泉

潭 凡二十潭

百丈潭在清潭峯下峯上有布水源滲瀦於此故名潭急瀉疾趨光芒四射分映脩林

清潭亦在清潭峯下百丈潭上峯水下瀉須經此而入百丈潭

逍遙溪諸潭盈溪皆石石隙皆潭行止不一色行者銀鋪止者黛蓄憑高望之若衆

星麗天閃爍不定惟棺材白沙孩兒鍋底四潭尤爲肖妙

桃花潭在桃花峯下花放水流別有天地以視涇川道上遜此幽邃多矣

白龍潭在慈光寺山門前桃花溪中相傳黃帝取潭水鍊丹感白龍見因名水深作碧黝色得日如瓊得空如晶澄澈可畏方廣數丈深不可測數石疊疊高二丈有奇水光搖蕩岌岌欲墮而終古激撞卒不崩潰亦一奇也水從疊石乘高而下一石仰承對潭之鵠凌空噴射見水不見石藥挑水亦由此流入硃砂溪松谷菴前亦有白龍潭註五龍潭內

九龍潭丞相源道中可望百丈飛泉直若巖下下注深潭潭疊爲九或方或圓殆類鑿成水色澄虛徹底深碧

方夜云逍遙溪丞相源以澗勝遊者至丞相源見山稍平衍輒不得意而去卽丞相源一澗已不能窮何論他澗九龍潭在丞相源下苦竹溪上澗落爲瀑瀑落爲潭潭復落爲瀑九疊也故名九龍平時澗枯水緩則潭色澄碧如懸片玉遠觀不暢雨過則水急潭深盤旋飛挂真白龍矣通山烟雨俱若爲潭所攝

又云黃山千仞成峯落卽成澗故山中無澗不峯無峯不澗余行澗中常不循峯徑捫巉履壁而上上則無不齒其巔曳杖而下隨澗而落無不窮其變遇潭遇溜

折陡絕則取逕亂林棧而度澗稍平復落澗行澗石磊落水湍急相遇則鳴激而過深卽成潭折卽成瀑奇變不竭幾與此山爭勝

石井潭在新羅源口若巨石鑿成者闊三丈水深無底新羅源近九龍潭石門潭在烏泥嶺下潭最弘闊

洪潭在潭家橋小河口湯泉水至此結潭與箬嶺水合宛如大澤故曰洪灣石潭在感梓里水口龍門山脚距和雲巖五里

朱家潭在迄溪橋下近黃豪嶺爲仙源名潭

滴翠潭在神仙洞下麟趾橋上承軒轅峯神仙洞諸水匯此深不可測色清且翠鮮妍欲滴

汪波潭在芙蓉嶺黃龍出海下淵渟泓澄鑿人鬚髮

五龍潭在松谷溪中緣澗而上者二左烏龍潭右白龍潭左窟形如方印其色黝題曰鑿澤或謂水流澗中鏗然有聲宜名漱玉右則在路傍形狹長如拖紳名曰流翠又呼爲玉檢合洞而源益巨上爲黃龍潭曰珠淵下爲青龍潭曰瓊玉曰空青

又曰澄碧巨石亘其後水潺潺出石罅中下注於潭以綆約之深倍尋其中青翠可摘璀璨奪目水味酷似楊子中灑泉或謂過之最下爲油潭其色綠也烏龍潭之北岸石凹如鍋曰炒子鍋油潭之路南壁崖橫疊曰油榨岸北有石如甕曰油缸溪中有四足魚時游水面或曰龍種或謂爲龍變化未知孰是

方夜云入松谷看青龍潭坐石上望潭無語可贊無色可似人多與黃龍潭並稱黃龍潭雖不及青龍潭然逆石而上沿而下大亞於青龍而澄碧與青龍無異者不可什伯計天下水色至此極矣當無復有出其上者余輩性耽水石志欲搜攬宇內至此則一潭若可了一生也遊者信耳至松谷呼導者引至兩潭上一觀卽策杖言歸以此多不知松谷潭富

烏龍潭潭上有石挺而覆之上鐫應夢龍潭四字係康熙六十年江南大旱山民夢此潭有龍故往取水雨卽立至因題此四字並繪刻烏龍將軍像暨聯於上鉢孟潭在鉢孟峯頂兩潭相並中間古松潭水澄碧若有龍居須上天都峯觀之則

楚楚

鐵線潭在石鼓峯後千巘幽窈神龍宮之歲旱投鐵擾龍眠霖雨立應一云赤線潭
卽黃帝探玄珠處

魚鱗潭在吊橋下近雙河口潭中嘗有魚鱗浮出色金黃大如杯光澤耀目或謂龍
鱗後山民在此禱雨輒驗若然則名爲龍鱗潭也亦宜

三壩潭在吊橋東去十五里之海棠壩上水從天海西海而下至此分往三潭曰頭
壩曰二壩曰三壩深幽靜邃與鐵線潭相伯仲亦藏龍之所久旱求雨於此無不
應者

綠水潭在吊橋色翠綠深三丈

雲門溪諸潭不曰雲門潭而曰雲門溪諸潭以溪中不一潭也其地僻其境幽其徑
險山嵐樹色倒影潭中頗饒幽趣但觀之者宜風定時雨晴時雪霽時

頂二

光明頂爲黃山之中天都蓮花之亞狀若覆鉢旁無依附秋水銀河長空一色名實

相符

吳庸侯云獅子之西爲石鼓峯石鼓之後爲鐵線潭又西二里許爲慈愍庵則三海門在焉海門之奇彷彿石筍而直劈萬仞西向爲飛來石至平天砦爲海子平天砦者前後海所從分也砦之絕頂高阜曰光明頂秋空澄霽凡日月出沒霞彩孤飛長天一色及夫積霧新晴朝曦高映山雲布護湧雪堆絺橫波疊浪俄而青螺點點矗立銀濤之上是名鋪海

大悲頂在蓮花峯之北鰲魚洞之東與平天砦光明頂並峙爭雄頂亦光明磊落惜無級可登頂之西南山麓有大悲院故址至天海東望頂居蓮花之背大有瞻仰大悲之概

級一

羅漢級在回龍橋東上與桃花峯水簾洞相對峙石壁巖巖欹挺巖腹高百丈左右清流淙淙走壁而下俗呼人字瀑布其水自天都峯中東兩溝合瀉經此而下

回龍橋入桃花溪中鑿石級曰羅漢級明前黃山山徑未開歛遊者多取道於此

井 凡四井

丹井在桃花溪南岸白龍潭對面洗藥溪中其口如鏡闊三尺內有石如卵光彩奪目其純白者不啻圭玉遊人每以無意得之井水甘美昔黃帝汲此水以煉丹故名汪侍郎道昆題丹井二字

水晶井在天海西隅石壁中距大悲院五里由西而下循河穿林無路可陟圓如滿月井口寬一尺七寸深四丈許自口至底如琉璃宮中純是水晶井旁有翠柏一株狀作覆蓋遊玩者可藉此扶之以下內有蛾眉月痕不知何時所鑿荆山璞玉終必顯於世界

香砂井在蓮花峯絕頂形如饋深尺許以手摸砂默而嗅之則有香若先言砂有香氣鼻以試之則否儒者格物每以理推之此又何理歟

龍眼井在獅子嶺下小平天砭山上窅然以深未有敢探其底者

池 凡四池

月池在蓮花峯絕頂下一層石平如掌內有池圓若月產放光香砂條有條無時隱時現下爲天然池水常不涸澆之可愈日昔昔僧普門疏之而成題曰勝水後有僧誅茅嵌石壁中住靜三年飲食浴漱皆汲此池水

袈裟池在翠微寺內相傳唐僧麻衣浣袈裟處池水長清不濁乾隆己酉夏暴雨蛟發山水泥湧瀾漫寺內與池水平而池水澄清如故

流杯池在神仙洞觀音座後

湯池原名湯泉在紫雲峯下長丈許闊半之深六尺池脈通硃砂峯久旱不涸其下細石皆若丹砂泉從砂中出纍纍如濺珠沸若燔湯有冷泉一縷從水面上尺許石壁中出以適均其溫涼近用熱水表探之冬夏均四十八度左畔水中一竅流由此出以指探之漸出漸冷雖日浴千人而清潔無纖垢池上天然片石覆地之半嘉靖中歛南某鑿石砌亭以成今式

大清一統志載湯泉在歙縣西北黃山第四峯下爲硃砂泉浴之可以療疾

汪師孟云東坡所記湯泉秦州駱谷渝州陳氏山居秦君所賦東城及匡廬汝水尉氏驪山惠州湯泉共有八矣今徽之黃山閩中劍蒲又有二焉各處皆作硫黃氣惟黃山有硃砂湯泉故朱彥游湯泉詩有嵩陽若與黃山並猶欠靈砂一道泉之句

附錄劉侗云考湯泉或曰赤道經之王褒湯泉銘曰白礬上徹丹砂下沉或曰下有硫黃以爲之根其臭硫也而味正淡西洋熊三拔水法曰湯泉硫之華疾寒服硫不若服湯泉其實由地氣熅沍溫涼之徵變故壤爲之硫泉爲之湯豈根硫也西國有山焉七十餘泉皆湯國王試得其性味氣各所主治各標厥泉以教國人

不獨硫焉蘇門答刺國境布那姑兒山產皆硫黃不聞其泉湯也又水火者陰陽之襲精陰得質而陽得氣爲泉爲湯陽得質而陰得氣爲燄爲涼然而水性非熱火性非涼湯泉以貯器還涼蕭丘之涼燄以燃物還熱唐劉餗曰江寧縣寺有晉長明燈歲久火色變青而不熱質存氣易此可徵矣

周體觀云按湯泉可考者廣志載一在新豐一在廣平吳郡錄載一在始興山一
在零陵一在宜陽南鄉荊州記載一在耒陽博物志載一在不周雲川名勝志載
一在灤州一統志載一在赤城一在蔚州一在孟縣北一在商城南一在汝州武
后常臨幸汝州志載一在歷山一在七峯山一在漢水南郡國志載一在宜春南
一在銀山縣一在溧水西南昭明太子曾浴此續征記載一在東萊郡一在武功
太乙山一在象水源一在沔池東坡詩記載天下溫泉以驪山爲最若分寧臨川
崇仁安寧寧州白巖德勝關浪穹宜良鄧川廬陵京山新田三泊凡數十處而安
寧爲最黃山拓州亦有之閩中尤多皆作硫氣人有疥者浴之輒愈竹木浸一宿
則不蠹蓋硫黃能殺蟲故也唯安寧清澈無硫氣有人見泉水赤如血浮砂片乃
知溫泉所在必白礬丹砂硫黃爲之根乃蒸爲暖耳水經註載一在漁陽郡北九
域志載一在遵化縣之福泉山下湯泉最著驪山最潔香蹊最熱遵化
吳鶴孚云湯泉考已載者不詳按潯陽記雞籠山下數十處壘石若砌水深尺餘
朝夕溢出時刻不爽朔望尤大號爲潮泉零陵志零陵縣出湯泉界石分流其陰

寒其陽溫丹陽記丹陽乘縣湯山有三溫泉述征記東萊郡溫泉恆沸烏墮輒爛
廬山記主簿山胡郎廟南數里有溫泉安成記宜陽南鄉出溫泉梁州記漢南溫
泉熱可熟卵未至泉二十里便見白氣貫天荊州記新陽縣出溫泉宜都山川記
銀山溫泉注大溪夏纔煖冬則大熱始興記靈泉源出溫泉有細赤魚出游莫能
獲幽明錄艾縣輔山其泉半冷半溫二水同壑冷可消暑溫可攘寒又按一統志
滇中溫泉非一惟安寧州碧玉泉最勝訪之親歷者水中一大石石中一穴相傳
碧玉座此其泉內外皆溫可鑿毛髮古稱藍田玉煖是玉之生處泉亦溫也黃山
芳冽惟碧玉泉差可與並則黟泉豈不甲天下哉

宋元符三年正月休寧金居德太平牛振兄弟三人來浴凌晨水變赤如流丹驚
相視不敢發言頃之地勢傾動波沸涌聲如雷屋舍皆震馳告寺人曰是必朱砂
發現也急以瓦器二十餘貯而藏之山下民間爭來吸飲至二月砂復發差減於
前久之視新器中者泉香甜清而砂沈舊器皆臭壞明成化中泉忽變赤流三日
人無知者惟一僧浴之壽踰百歲萬歷乙卯朱砂又復涌出徧溪皆赤芳冽異常

飲者宿疾咸愈崇禎間有患瘋癲者入浴亦愈歎人曹彌大讀書湯寺見一人鬚蒼黃日濯池中百日變黑如漆此彰彰於人耳目者因並記之

湯池舊志載在泉類今人皆呼爲湯池其形亦池式故移入池類以符名實也

石 凡七十二石

迴瀾石在桃花溪中泉奔觸石石不勝水則爲頽波爲狂瀾巨石砥之其行也紆徐

磬折趨下之性爲波轉渦回矣石之爲功於溪也大矣哉迴瀾石三大字江中丞

東之所題

藏舟石亦在桃花溪中首尾如舟藏茲深壑若武陵漁人舍而登岸者

呼龍石在白龍潭側石上劖呼龍石三大字

彈琴石原在水簾洞中今舁置桃源菴方廣厚薄如琴磚因聽泉久擊之能發絲桐聲

麟石在虎頭巖下距丹井僅數武纖小有致

硃砂石在硃砂峯下

鶯谷石在金沙嶺下俗呼碰頭石

趙州茶庵前巨石在文殊院道中石踞山巔當庵之頂明崇禎甲戌七月山水暴漲

石隨流止此

龍蟠石卽龍蟠坡又名打鼓墩在橫雲路西南

觀音石俗稱觀音灑淨前有小矮石又名童子拜觀音在天都峯麓法像莊嚴前後

左右視之皆不二形昔有松生於肘如持楊枝在雲巢洞口下東視尤爲楚楚

蒲團石在小心坡上臥龍洞下石平坦如蒲團正對天都峯可趺坐十數人遊者至

此輒踟以息足

鸚哥石在一線天色隱碧而形如鳥

飛魚石距一線天不遠鼓鬣排空宛然生動

鳳凰石文殊院前可望鳳凰鳴矣於彼高岡軒轅之世或已見來儀之瑞耶

獅石在文殊院左獅性不暫住茲傍臺而蹲當是其踞地然近視肖遠視不肖固知

法王自具神通

象石石形長如象伸鼻亦佛門中具大力者在文殊院右

浣火石一名放光石在蓮花溝上碎之入火影霞星射熏衣衣之可治痘疹山僧嘗以此石贈香客

兔耳石俗呼兔兒石近文殊院右登蓮花嶺道中也左右皆絕壑石畔可望白嶽遠餐秀色如指掌列眉

貓石在蓮花洞洞前奇峯嶙峋如束竹管邊合中罅當峰稍亞有石筍筍端石如貓踞兩耳直豎尾背俱全

船石在蓮蕊峯頂梳檣畢具原名軒轅船一名採蓮船又名渡雲船俗呼洪船出海龜魚石距蓮花峯十步許石窄而險穉穉松檜生石上深巖四絕猶弱水也鮮有駕棧而度之者

容成朝軒轅石在蓮花峯西下上下兩石如冠帶臨朝俗呼容成朝軒轅面目縷析慈航石石狀如船此亦筏喻之義在大悲頂左

法袋石在大悲頂右石如彌勒所荷囊於空虛中橫裹未來三千大千世界緘口不

開中果有耶果無耶疑殺天下禪和子

飛來石在海門飛來峯上現稱仙桃峯石高二丈與下石絕不相屬似是天外飛來

又穎林菴前石峯如柱段段層壘縫合極密至頂兩石立如筴似合實分復一石

寄一筴上亦如飛來者視之若搖搖未定風掣欲去又翠微寺西峯堂側一小石

亦名飛來石又白雲溪路東亦有之

飛雲石在海門如棲片雲而承之以靈掌又若懸空而復剗其半其勢甚危

杵白石在鍊丹峯下洗藥溪中相傳黃帝用以搗藥者普賢洞下亦有之

雙龜石在石門峯兩山相通山半壁有大石橫架其上兩畔相對各有一大石狀如

龜形長數丈可通人行

猿猴石在雙龜石左側動靜各肖其形

海船石在石鼓峯後壑張若海雲涌如波石其船若之寶筏乎

擾龍石由散花塢鳥道歷二阜巨石聳立石頂有擾龍松

八公石在石筍砭賦形逼似

立佛石亦在石筍砭從穎林菴右隅瞻望慈容如紫金範就立身峯巔低眉接引衆生得不普度耶

波斯進寶石在穎林菴後石貼峯壁宛如波斯人凹目高鼻手貢奇珍皆肖第名稱不雅馴耳

淨瓶石石形如瓶在皮篷前

鵝鼻石在三汊復興橋西山上近丞相東源石高如鵝首

打鼓石在黃絲嶺北腳擊之作木革聲

怪石嵯峨在檻窗峯寨門源長嶺上路西有獅子石被雷擊去下唇又有貓兒石路

東有老鼠石近排亭下距譚家橋七里

龍吟石在龍吟寺旁從新興寺可至按龍吟之聲若物戛銅器爲雨徵擊此石而聲似之輒得雨

獅子石在和雲巖下清潭灣河中形如獅子搏球石中一潭圓似鑿空水碧如油相

傳呂純陽過此坐是飲酒賦詩石上刊有字跡斑剝不可辨認惟爐竈猶存邑宰劉元凱有云愛水心偏遠觀山眼更青卽詠此也

引針石在引針峯峯頭碎石能引針故名

馬蹄石在芙蓉峯下石上馬蹄跡二三十深者尺淺者二三寸如馬蹄之印泥中相傳爲黃帝馬行跡

座盤石在芙蓉嶺東山逕舒而平

鶯石在松谷道中松籟寂靜時如聞啾啾

天榜石一名天牌石直黃如榜在松谷菴以上中劉門亭對面籀篆數十策策勒勒非波非磔奇古不可辨識旁有石如衣冠丈夫俗呼仙人觀榜羅太守汝芳架閣道觀覽譯得一仙字雷卽擊其字去石東則皆絕壁壁半一穴中空類半窺可透

隔山天光雲影俗呼天眼豈五丁開鑿時有意爲黃山點睛耶

探水石近翠微峯久旱將欲雨石覺探出幾尺山民見之則歡呼三日內必沛然下

雨屢試輒驗

馬頭石在青牛溪上如天衢神駿昂首而鳴

笠人石在湯嶺上狀如人戴笠而立西來大意我欲往而問之

劍石由鳴絃泉谷折而徑有巨石倚巖中裂如切若青萍所擘者

醉石在鳴絃泉左側弁而逸若不勝栢棖者昔李青蓮遊此遶石醉呼

停雪石在醉石傍泉淙淙從石壁下下有石陽白而陰黝如停雪

薌石在珠湖山下汪侍郎道昆題石依林薄四字

藥鈔藥瓢石在虎頭巖下白雲溪中

扁擔石近逍遙亭狀如扁擔

香爐石在逍遙亭下

碁盤石在吊橋菴下壽延橋上路西一石方如几相傳有仙人戲弈於此今太平陳

居士兆軒設路燈於其上

達摩祖師石在丹霞峯岡上

緊淺盃石距虎頭巖里許上湯嶺路東石壁中凹如淺盃山上一縷之水流入此盃

而下四時不涸遊客至此飲之以止渴

金雞石在半山土地東岡上有石如雞獨立翼鼓頸伸西對雲門峯又名金雞叫門
簾

橫雲石在三觀嶺南脰半山土地上文殊院至此一石橫臥似阻絕不可通者常有
雲繞之故孫太史晉劄橫雲二字於上

姊妹放羊石在蓮蕊峯下坳處前隔數武有石如羊後有二石似二人並肩而立狀
如驅羊

仙人對弈石在白鵝峯側中如方几東西兩石人靠几而立狀若對奕如在始信峯
巔望之尤爲清楚

開門石由苦竹溪上丞相源必入之門兩石夾立僅容身過

油榨石在松谷菴下油潭塆路上壁崖橫疊有石如牀因油潭而得名

仙人曬寶石在松谷菴後岡上有石如几上有小石狀如元寶旁有風雨晦三字不
知何時所鐫也

童子拜觀音石在松谷菴老基之上有兩石對峙大者若合掌跏趺小者若鞠躬下拜又寶塔峯上一石趺坐謂之觀音打坐

拾八羅漢朝南海卽石筍峯石筍林立瑤簪森秀遠睇狀如羅漢前擁後擠有爭先恐後之態又稱五百羅漢朝南海

天鵝孵蛋石在獅子峯北下四里許上劉門亭上西岡一石狀如雞伏

猴子石有四散花塢中者名猴子龔桃獅子峯北者名猴子過山白沙砦文殊院兩處則皆呼爲猴子峯猿拱獠升形狀均肖

海棠壩在西海近三壩潭由白雲菴上天海乃必由之路壩爲橫石狀如關欄因海棠花叢生於此石之旁故名

指象石又名指象處在西海距海棠壩十里奇松異石羅列雜陳東有一石如人舉手向西指之西有一石如象昂首向東望之

五星石一名天官賜福在始信峯坳中如在清涼頂東眺之宛疑身入劇場也

岔凡二岔

峯岔在翠微峯旁岔內廣袤五百餘丈東南北三方皆陡削惟西口有關隘咸豐間粵寇盤踞山麓山民賴此岔以藏身者千人西下五里有河裏寨南去五里有石步岔皆避亂之所山民扼塞拒守爲犄角勢寇莫敢犯

石步岔近西海在伏牛嶺山頂盤折而上距嶺十里岔口有石名曰鼻孔梁只容一足岔內平積數十畝有小徑可通峯岔咸豐兵燹時太平西鄉人民多藏於此倚石爲寨粵寇屢攻不得破傷亡頗衆

湖凡二湖

陽湖又名洋湖在獅子峯西北芙蓉峯下方廣五里瀦水成湖漲時一片汪洋故又曰洋湖有菴狀如蓮花宛在中央又有社公墳古傳十八社今無考焉

陰湖在座盤石下卽芙蓉嶺東山隴中與陽湖對峙一在芙蓉嶺左一在芙蓉嶺右俱能栽種

砬凡砬七

平天砬在天海爲黃山之中部如屋之正樑焉橫長一百三十丈豐廣三丈平如几
砬之東阜爲光明頂砬之西阜爲石柱峯砬之南爲前海砬之北爲後海其西則
曰西海勢若飛虹橫架天表遙睇長江如匹練九華如螺髻也又獅子嶺北下路
平如掌袤可十數弓俗稱小平天砬

白沙砬在丞相源後卽雲谷寺來龍砬之上段爲白沙嶺砂滑而溜踏之不慎輒蹴
而扑

石筍砬在石筍峯北下平如掌有穎林菴故址四顧奇松怪石的未會有黃山奇絕
無逾此者

汪晉穀云石筍砬百萬千矛森列錯刺如常山蛇勢砬西望有立佛東望有貢寶
番附於砬胸有遊仙皆裁石肖形無毫髮遺恨佛宜冠冠之番宜弁弁之仙宜劍
劍之宜佩佩之宜髻髻之宜巾巾之造化狡獪一至於此大奇大奇

姚文蔚云由石筍峯下石筍嶺峭聳插漢其峯各有形似若諸天散聖覲面參請若垂紳正笏東西班立若奇花美女爭妍角妙朝暮倒影彼此相親竟二十里水口收之數折而至松谷菴黃山奇絕無逾此矣地屬太平從新安來者鮮有至焉方士翊云望石筍缸諸峯片片疑削乃若秀拔千尋奇姿萬疊恍如朝霞布彩雖置丹青於其側何所舉似

汪大海云從始信峯轉至石筍缸其峯石之怪罄天地所有物象靡不備具竚望久之目眩神搖不信人間有此異境也

鄒匡明云尋石筍缸見諸峯亭亭屹立有驚起者有獨拔者有橫裂者有直折者有崩欲壓者有危欲墜者左右無支峯無贅阜而石骨中皆有怪松倒植橫生葱蒨相糾

跑馬缸在夫子峯下大戰嶺旁下有黃帝坑古稱黃帝嘗遊此跑馬

洋湖缸在洋湖旁汪洋千頃以缸爲障

九龍缸在九龍峯下缸中多巖洞莫能名之嘗有方外人居此修真以黃精充食

泥鰍缸在雲門峯北下形若泥鰍欲探雲門

梯 凡二梯

長梯短梯在湯嶺南下六里路峻峭狀若長短梯故名卽鳴絃泉橫坑菴之間
百步雲梯在蓮花峯西脰鑿石爲級護以石欄北達鼈魚洞南通蓮花嶺東上蓮花
峯梯欲二百餘級曰百步者舉成數也

塢 凡二塢

散花塢在始信峯獅子嶺之間諸峯環布若城郭塢中蒼松怪石古木奇葩應有盡
有如夢筆生花擾龍松擾龍石諸名勝俱在於此

吳光曾云今人家園圃中得拳石丈許色鮮質麗者若獲拱璧此則萬千羅列令
人應接不暇短者徑寸長者千尺或峯頂若錐大石覆其上寬廣數倍黏附依稀
恆有落勢皆不可以理度者乃至擬貌肖形則昔遊人已不勝舉似安得強生擬

議爲散花塢去獅子林不遠自北而西入谷宛然門戶四面諸峯布列高峙若城郭下臨深壑古松怪石穿插成行上下參差千態萬狀黃山之勝不待言而一片幽奇秀鬱之致造化獨鍾於此方若繩謂不到散花塢不知天下有奇石迪菴謂一步一叫絕今則一步十叫絕兩人足當此山知己

寨門塢在檻窗峯下又名寨門源源口近長嶺昔爲軒轅紮寨之地怪石壘壘遍布塢中

海 凡三海

天海又名前海在鼇魚峯平天砭之間天空地闊一望無涯

後海在平天砭之北以獅子峯爲鎖鑰又光明頂之北與後海相連亦謂後海因光明頂在平砭東阜前後海以砭分之文殊院立雪臺觀後海卽光明頂之北石門源是也石筍仙都諸峯爲後海北障由此推之白鵝碁石兩峯正爲後海中峯

西海在平天砭之西東爲丹霞峯西爲雲外峯南爲西海門北爲松谷菴後河廣袤

二十餘里

黃山以雲鋪海爲最奇絕。三海中均常出雲，時而白雲墳起，乍伏乍昂，若斷若續。時而黑雲數片，依遠盪漾，若島嶼在銀海中，與坡上下遠近，松濤彷彿潮聲澎湃。文殊院前清涼台下，皆有之，而游者則可遇而不可求矣。

黃山又稱黃海，其奇處尤在雲。或黃昏黎明，或晴天之夜，雲來頃刻，瀾漫無際，上視青天，無纖毫之障，下視諸壑，有濃絮之鋪，若大海然，故謂之黃海。

閔麟嗣云：按山川原無定名，惟人所名。五嶽四瀆，載在經傳，而不敢易。黃山稱黃海，以山中雲濤奇幻，異於天下名山。潘公之恆創爲此名，相傳已久。太傅姚文蔚謂：登光明頂，則諸峯羅列，似兒孫遠視萬山，層疊渺茫，無際頃之白雲，自山麓上騰，瀾漫漸布，近者兜羅，遠則黃金，盱衡曠視，直與天接。山頂浮翠，若島嶼在銀海中，與波濤上下奇觀，哉其名海子，不虛耳。云云。參以三原韓中翰詩及諸名人遊記，卽未目擊，亦信立名之確固，不必苛求何典也。篇中引吳時憲論三天子都，卽黃山，愚竊謂探源者必異於懸揣，惟汪循率山紀遊爲可據，安得起九京而請質。

之

口 凡二口

黃山谷口在王干腋出咸通寺之右於王干爲出谷矣今爲容溪外途中有亭內嵌黃山谷口四字字甚蒼勁路爲徽郡孔道距祥符寺八十里容溪至湯口沿途村落雖各有名稱而統號之爲黃山源久載口碑可見黃山東南以此爲谷口

西海口在丹霞峯南頭東角仙桃峯下石鼓峯上黃山多石壁惟此口平衍有土廣袤十餘丈野草叢生有水浸之四時不涸蹈之愈陷下若虛空者此口在後海西海之間俗云西海口通西海良然

山 凡二山

貢陽山在獅子林對面翠擁螺環宛然屏障四顧皆石壁惟此山有土質雜樹千章團陰結翠黃山此處又別有風味

肖黃山在黃山北境三折嶺內爲臧里程姓之後山東距太平縣二十里南距黃山芙蓉嶺三十里雲根嵌空幽秀彷彿黟山中有奇峯怪石及噴玉泉牧龍池諸勝境

關 凡二關

湯嶺關在山之西坳湯嶺頭上東西陡峭之壁南北嶺路磴高級危各十里勢若登天嶺頭隙地用石砌成關隘清咸豐己未張中丞芾駐徽所建以禦粵寇一人當關千夫莫敵惟此足以當之

烏泥關在山之東邊烏泥嶺上上下下連築兩關上關額爲天都保障下關額曰烏泥爲明崇禎間唐太守良懿所建清咸豐間張中丞芾所修

坑 凡二坑

黃帝坑在夫子峯下近大戰嶺跑馬缸山民相傳爲軒轅氏曾在此汲水洗藥後人

卽以黃帝名其坑

大聖坑亦峻峭在翠微峯之下內有石屋祀大聖菩薩並有翠雲庵故址

坡 凡二坡

小心坡在蒲團石下觀止二字上左絕澗右峻壁路僅容足側身始過咸稱最險之

處後人鑿級護以石欄古稱小心坡今謂石欄杆

龍蟠坡卽龍蟠石見石下

碑 一

軒轅碑在桃花峯水簾洞右爲軒轅氏上昇後山人立碑祀之四千餘年之碑石足稱古物故前志列入古跡亦宜

島 一

蓬萊之鳥在文殊院轉身洞之下一線天之上路東三四危峯尖銳矗立又有小松環峯而生奇松怪石四字可爲此處詠之每於月夜遙矚之如島嶼聳出海中有非飛仙莫渡之概

嶺 凡四十四嶺

雙嶺在歙縣西鄉距岡村十里明太祖破僞漢時駐蹕於此上有御泉庵踰左至歙縣孔道踰右至休寧孔道

大嶺又名高嶺嶺上有觀音廟南達岡村北達小嶺下

小嶺在大嶺北相距二里中隔小嶺下陳村由岡村至湯口十五里先越大嶺後過小嶺嶺屬歙縣西鄉

山口嶺嶺上有汪公廟在歙縣西鄉東達洽舍西至山口從徽州府上黃山嶺爲必由之路

甜珠嶺由饒中沿溪至水晶庵再進至嶺踰嶺經金竹坑達巡檢司

石礎嶺過嶺再度一嶺卽至芳村

柘木嶺卽查木嶺在湯口右二里嶺上下薔薇夾道叢生開時燦若黃金嶺南一里有扁擔亭亭外二里爲寨西舊設有黃山寨巡司署過寨西橋有二逕一隨河五里至芳村取道抵歙治一南折二里至小嶺三里至大嶺五里至岡村取道抵休寧山中出入兩縣此爲通衢

芹菜嶺又名金絲嶺俗呼涇川嶺或云涇縣人所修故稱之在歙縣湯口河東從嶺至苦竹溪五里西上九龍潭丞相源北出三汊烏泥關

金砂嶺由慈光寺登觀音堂陟嶺眺天都頂有石臺憑虛背辰一屏方正聳拔意軒后朝羣仙處

三觀嶺在老人峯背卽天門坎普門曰東望文殊院觀文殊是曰智觀西北望大悲頂觀觀世音是曰悲觀又西望普賢殿觀普賢是曰願觀遂名爲三觀

象眼嶺在天都麓相傳仙人騎象登天都峯捨象於麓仙去象化爲嶺語屬荒唐不足徵信

蓮花嶺在蓮花溝上卽蓮花蓮蕊兩峯之間東眺天都如圖畫嶺半有洞亦謂蓮花洞越嶺過石罅而度百步雲梯文殊院達天海須由此而往

梅檀嶺從光明頂至煉丹臺道中形若檀爐高恃百仞石筍二峯大者不可登小者纍纍數石片佈置如戶每方獻異呈奇松蟠其上若張翠蓋焉

白鵝嶺在獅子峯東坳往丞相源須度此嶺唐溫處士伯雪隱此李青蓮有詩贈之嶺東稱爲白鵝峯

白砂嶺在白砂江上由白鵝嶺達丞相源道中沙軟而滑履之如積雪珍珠嶺在丞相源至苦竹溪道中

盤雲嶺欹側巖從遊者盤磴而上如入雲中嶺上有洞可棲三十六峯盡列洞前烏泥嶺在丞相東源下南達歙縣北達太平宋蔣果與金人馬吉戰拒守嶺上明末寇常叢聚於此嶺上有關距三汊三里黃山諸嶺俱巉峭茲嶺平衍紆迴纓帶巒阜旁有石門潭可遊

黃絲嶺在黃絲境下首嶺頭爲歙太分界處豎有界碑

長嶺在黃絲嶺下下距譚家橋七里嶺上有排亭亭旁有怪石嵯峨嶺長里許平衍無甚級爲徽寧要道行人繹絡過者每不知爲嶺

棧堪嶺在箬嶺脚嶺上有步月亭屬太平縣道一圖上箬嶺先過此嶺

箬嶺卽箬嶺在黃山之東高四百八十仞多箬竹南通歙縣北達太平隋末越國公所開東鑿一道至旌德嶺極高峻接壤黃山八里岡上有騎龍庵昔僧文齋坐脫處

銀絲嶺嶺頭有汪公廟嶺北有勝虹橋嶺南爲感梓里與黃榜嶺一望間

黃榜嶺在望仙峯東野屬太平縣南鄉爲徽寧孔道南有勝虹橋北有黃榜橋故嶺

上社廟有聯云半嶺通佳氣雙橋落彩虹

黃毫嶺嶺頭有石洞設菴施茶以濟行人嶺下河中有潭曰朱家潭潭水渟泓深不

可測南達迄溪橋至黃榜嶺十里北達三口鎮至官莊嶺十五里

官莊嶺在軒皇山下爲三口北障嶺上有亭有廟距太平城南七里

楊樹嶺在望仙峯東下屬太平南鄉由譚家橋至神仙洞須越此嶺由羅村碧山胡

家過大戰嶺南折繞夫子山脚而上

大戰嶺在夫子峯下東爲羅村西爲夫子山脚嶺旁有跑馬岡黃帝坑諸名勝

尙書嶺在望仙峯東北越嶺可至尙書里高百餘仞相傳隋末尙書胡裕隱此

大鼇嶺近尙書嶺高十五丈形若巨鼇

三折嶺爲黃山北障在太平縣西鄉高峻曲折上有寺曰大覺下有潭曰香潭佟督

學法海在此望黃山有詩七絕膾炙人口嶺南五里至甘棠

悅嶺在太平之西距甘棠里許通焦村孔道

興嶺在黃山之北距太平縣甘棠八里踰嶺而南黃山三十六峯峯峯入望

中虎嶺在輔村東北距芙蓉嶺十里有洞嶺下有秀水亭亭旁石壁中出水故名

由太平縣溝村踰嶺達輔村至松谷脚菴右過洋湖庵直度芙蓉嶺至松谷菴

鶴舞嶺爲輔村北障距芙蓉嶺十二里與中虎嶺白茅嶺爲三角形通太平縣甘棠

大橋要道

白茅嶺在引針峯北東距輔村西距焦村各十五里又名菜坑地少樹多白茅白葦

芙蓉嶺在芙蓉峯下嶺頭有洞名芙蓉洞由松谷菴至嶺二里嶺腋有芙蓉庵下嶺
七里至輔村竟成橋分爲三路左度白茅嶺至焦村右上虎嶺歷溝村饒村黃昏
洞柏樾山二十里至太平縣中出隨河踰鶴舞嶺至太平縣甘棠大礮

獅子嶺在獅子峯清涼臺下北達松谷庵嶺路傾圯近爲黟縣汪居士蟾清所修

娘嶺在黃山西北嶺長十五里嶺頭爲石埭太平兩縣交界之所嶺路失修近爲陳
少舟陳兆軒陳麗春方志臣暨焦石鳴焦遠帆焦秉臣諸君慨捐平治行人便利
嶺頭有庵四季烹茶左有汪公廟右有企嶺亭亭爲陳居士少舟獨建

白沙嶺在白茅嶺西北由引針峯蜿蜒而下初結白茅嶺次結白沙嶺嶺上有洞嶺
脰有菴有亭太平縣東西兩鄉以此嶺爲界嶺路曾爲陳少舟所築北由新村至
興嶺南由章村至焦村皆十里西有小徑可達娘嶺

棠梨嶺在新嶺西近龍山菴山脈西由羊棧嶺而來東往結新嶺再東結浮丘峯雲
門峯嶺之陽屬黟縣嶺之陰屬太平亦徽寧要路也陡峻崎嶇綿延十五里乾隆
三十五年太平林兆朋焦發等募金平治又於嶺半募建萬福菴召僧煮茗以濟

行人嶺下林姓又醱金爲路會義社二其一社則於夏秋刈草一社則於隆冬掃雪

新嶺在浮丘峯西棠梨嶺東昔爲艸蔓嘗被水阻近得太平焦茂才松林等連建四橋庶免病涉嶺南屬休寧里仁東坑等處嶺北屬太平田坂里密坑等處

伏牛嶺在吊橋菴西下五里嶺頭有亭亭後踰山可達石步岔越嶺西下五里至栗溪坦又五里至椒村陳家再二三里至焦村與雙溪鎮由太平縣焦村上黃山先度伏牛嶺再躡雙峭嶺後過湯嶺

湯嶺在雲門峯東坳嶺上有關南達紫雲菴北達吊橋菴皆十里上下道路昔爲太平陳居士珊瑞所修近爲其五世孫少舟復承祖志又修之

建置

寺院菴堂 凡二十五處

祥符寺在桃花峯下唐開元天寶間志滿禪師創始大中五年徽州刺史李敬方感白龍見建龍堂於湯池之西天祐二年歙婺衢陸觀察使陶雅建庵號湯院南唐保大二年勅改靈泉院有碑紀事宋大中祥符元年十月勅改今名元豐甲子寺僧立太重建明正統丙寅僧全寧修之嘉靖癸未僧暘谷再修之萬曆辛巳涇縣知縣李邦華捐俸又修之歙縣左訓導田藝蘅有記寺前羣峯聳秀溫水生香古木千章風動谷鳴清谿激越有若響答真入山之奧區也清乾隆五年六月初三天雨三晝夜寺前桃花溪青白二龍相鬪洪水暴漲瀾漫山巔寺宇飄沒諸僧淹斃僅存一小沙彌寺基久成墟邱開植茶葉後歙縣湯口居民於湯泉溪塆上募建數楹仍榜書祥符古寺亦聊以存意焉耳

軒轅宮在紫石峯下或云祥符寺故趾今湯池壁間鐫有軒轅行宮四字明狀元羅

洪先有詩題此

紫雲菴在紫雲峯下清乾隆七年慈光寺住持印聞和尚號悟千退居結茅於此故名茅蓬近湯池以便遊人駐足屢次建築殿宇俱爲慈光寺僧阻止直至甲申冬月得尙書曹文植部郎程振甲力始克成功額曰紫雲禪林咸豐己未九月大殿被燹諸佛像移供客堂同治十二年十月住持錦雲受星巖道純上人法開堂放戒又乞上海來遊之僧代募文殊法身溯江而上經由太平縣送此卽今座中之巍巍菩薩也光緒三年建右邊寮房五年重建大殿十六年至二十一年又建前樓及各餘屋俱僧性海所經營前樓猶一菴面部一廳三房窗虛軒朗俯臨溪壑仰對雄峯拂簷則翠竹蓮花穿窗則清風明月前有桃花源水簾洞後有羅漢級紫雲峯推窗寂坐神怡神曠栩栩欲仙倏然飄立不知身之何寄也黟縣王司馬家瑞顏曰第一洞天信然門首黃山一茅蓬五字乃悟千題示其徒野雲以志僧家得把茅蓋頭爲足之意現在五字卽歛紳蔣龍章換書此菴近爲慈光寺住持脫塵兼理

慈光寺在硃砂峯下舊名硃砂菴明嘉靖間玄陽道人居此額曰步雲亭萬曆丙午僧普門入山玄陽之徒福陽以菴界之普門改名法海禪院旋入都感宸眷神宗勅賜藏經六百七十八函慈聖皇太后頒內帑爲薙髮並賜銀帑爲開山建寺又賜紫衣佛冠彩緞百疋辛亥秋欽點慈光寺額降勅護持又賜七層四面毗盧滲金佛像像七層層四尊凡二十有八尊高四尺有蓮花座座有七準提居葉中一葉一佛佛以萬計皆慈聖及南宮所施造也隨勅送奉大悲金佛十二尊青宮賜大悲金佛兩尊清康熙丙午欽縣黃太學僕始捐建大殿並修藏經閣及餘屋一百餘間閱四載落成共費四萬餘金金碧輝煌爲徽寧梵宇之冠康熙辛巳中洲和尚又募二萬金重修之聖祖仁皇帝親灑宸翰御書黃海仙都四字賜懸佛殿天章璀璨光侔日月後於乾隆二年三月初一寺遭回祿藏經被焚御匾及七層四面佛得救無恙住持悟千募花萬人緣未果次年卽將毗盧一殿縮小修竣因經費支絀中殿未建咸豐間土匪掠寺並將七層四面佛用火焚化瓜分今文殊所坐之臺卽七層四面佛之塔底也自焚掠後寺宇頽圯景物蕭瑟僧人素月性

海及明心輩承衰守敝次第修補民國紀元雪嶺住持添造功德堂重葺門樓殿並塑羅漢諸天八十餘尊自咸豐後宗風始爲一振現係雪嶺之高足脫塵住此又建大悲閣五間克承師緒有足多焉

程從仲云寺藏佛牙賜自禁掖約重五鎰色若車渠而光潤滑膩過之見者咸疑世人安得有此牙審如是則口當如箕然佛身不可以情量測史冊載防風氏其骨專車推其牙應復如是大抵人身大小視其刳數中古之人已不逮上古河況叔季曩聞之藏用先生云此是辟支佛牙僞者乃外國獬齒非真牙

半山寺在中溝左塋恃半山土地而築民國甲子夏江寧觀音菴僧明光參遊至此結茅住焉後建三間佛殿易茅以白鐵蓋之原名無量菴乙丑秋休寧縣知事韓燾改題半山寺寺基雖窄足以棲息遊踪

文殊院在天都蓮花兩峯間後擁玉屏峯前拱文殊臺左獅右象勢若守門登臺跌坐煙雲無際院久湮沒明萬曆間僧普門攀陟至此與曩在代州夢文殊端坐石臺之景適合此境遂闢徑構屋懸文殊像額爲文殊院崇禎子丑間不戒於火戊

寅歲休寧汪居士之龍重建榜以到者方知四字爲歙縣汪孝廉沐日所題聯曰
孤雲臥此中萬山拜其下釋道據所書院右有憑虛閣可望後海諸峯與院俱燬
院旋復而閣仍就湮清咸豐末院又遭兵燹文殊避劫到寧波示夢陳居士瑞利
瑞利三世信佛樂善好施因供像於家敬奉極虔至光緒初依夢中所示轂資來
山適普陀山慧泰慶三三僧挂瓢守此餘燼瑞利卽鳩工庇材於丁亥冬月告竣
由僧德圓接住卽現在之老人也文殊神像由上海裝塑而來儼然活佛院記爲
明太學潘之恆撰

大悲院在光明頂平天砭之山腋光明頂踞四山之中古稱大悲頂明萬曆間僧普
門感激宸眷因供奉皇太子賜大悲觀世音像故名院遭粵亂久沒無聞今慧林
和尚參遊至此剪除荆棘募捐重新無如攜款過江蘇適江浙戰爭之際被匪所
劫以致中止昔有金剛般若鐘計重五千四十八斤汪居士景和所鑄遍覓不得
已如黃鶴矣

隱泉茅蓬在光明頂西下僧惟開於民國癸亥來山編草索綯自築茅屋四間越兩

月告成次年悟證由太平城山觀至此結爲同參惟開遂將蓬界之雲遊而去

獅子林在後海獅子峯下明萬曆間五臺僧一乘結茅於此旋擴爲庵清順治初釋靈聞繼居林中能詩文著有黃山紀勝集康熙二十年太平縣知縣陳九陞偕鄉紳譚經遠李夢奎暨竹林會七子醮金重葺祀觀音故又名觀音菴爲一邑香火並捐俸置望仙鄉水田二十一畝四分以齋住僧乾隆中元僧慈舟屢修之嘉慶二十五年崔居士必位等又修之咸同兵燹殿宇摧折光緒五年譚南邨李敍五皆竹林會之賢裔也募款重建鄒鍾俊胡肇祺兩邑宰先後撰記嵌於林中民國壬戌右牆傾圮陳居士仁梅捐金易石砌之明年前牆岌岌將頽李居士法周盡易以石嶄然一新林額壁聯爲法周所書前邑令劉元凱陳九陞黃家傑俱有楹聯現宏定之徒惟清住此由法周護理

獅林精舍在獅子峯下與獅子林爲比隣傍牆而築如一室焉光緒乙未太平崔太史國因所建國因少時讀書於獅子林筮仕後出使祕日美回國捐俸千金以酬舊願委譚外翰南邨董其事顏曰獅林精舍爲國因親書按明人王之傑遊記云

獨此據勝地稱精舍是精舍之名由來舊矣其爲國因重建無疑舍之上堂設龕祀地藏乃江寧李居士法周號蓮華誦拜妙法蓮華經處所居士於此十年持誦無虛日

清涼頂一名正頂清涼寺爲臥雲樓舊址在獅子峯南脰獅子林上民國己未峨眉僧法空由普陀參遊到此感黃山之勝誓願建寺以開叢林得太平勸學所長陳之澍暨鄉紳譚復泰漢商項竹坪王森甫滬商汪蘭庭汪蟾清諸護法募捐鉅款以成梵宇供佛於樓石室繙經莊嚴清淨查五臺稱大清涼此處稱清涼頂兩山皆爲文殊顯聖之地將來檀信輻集並駕齊馳香火之盛豈有限量哉

中五臺菴在貢陽山下左爲獅子峯右爲始信峯前爲散花塢又夢筆生花天然筆架諸峯羅列爲案黃山秀異莫過於此黟僧宗教伐木剪棘開闢新基創建蘭若殊爲難得護法者據云以蕪商朱晉侯爲最

雲谷寺原名擲鉢禪院在丞相源鉢孟峯下源有歙縣巖鎮汪圖南書院明萬曆己酉寓安寄公攜笠至此乞地於汪不數月而成梵刹潘太學之恆題曰一鉢湯太

史賓尹易爲擲鉢晨昏課誦悉稟雲棲筦庫各有所司截然不紊無易和尚更擴增之僧成濱能繼其志雲谷二字乃崇禎間歙縣令傅巖所題因遂名爲雲谷寺寺有藏經閣極爲嚴整徽州郡司馬聶煒撰碑紀其事清康熙至道光時迭設戒壇羯磨後生咸豐流寇佛宇摧殘肇龍伽邪折東補西安陋就簡宣統辛亥忽遭回祿李居士法周從旁捐築數椽以爲遊人息足寺由隆光接住募化十年僅暨大殿數柱風雨飄搖詎能長此終古是所望諸護法者近易僧寶山住此

福固寺在軒轅峯神仙洞下唐天寶六年日輪和尚至此開山建軒轅古刹後經咸同兵燹改復古寺光緒戊戌鄂僧能學得龔相續師衣鉢重修大殿太平胡太史繼瑗爲書寺額易以福固二字寺右關帝殿額乃太平周茂才開基所書近爲滿光所居

松山寺原名花山寺在望仙鄉玉屏峯下宋紹興十三年賜額戶籍太平縣望仙鄉一甲自菴自主清康熙十五年大殿重建官邑侯純心贈大雄寶殿四字於扉康熙間住持智昉乾隆間住持萬競皆爲黃山僧會司自宋迄清歷經四朝代出高

僧法嗣故呂廉訪正音王太守國柱朱觀察之翰潘督部錫恩暨歛太兩縣長官
圖四十餘人皆贈有匾可爲黃山諸寺之冠其書法勁蒼雄秀無美不備咸豐間寺
毀於寇區得無殃僧明軒卓錫重來力新佛宇今爲明軒後裔接住日漸凋零不
無今昔之感也

松谷脚菴乃松谷別築上距松谷七里下距輔村三里近雖重修亦不過補苴罅漏
而已近爲九華山心堅和尚所駐室

洋湖菴在芙蓉峯下湖廣約十頃爲黃山之西北部吳中祕養春初爲羽士申清虛
而建四山狀如蓮花泛繞擴拓佈置能開絕大道場遭咸豐兵燹夷爲墟邱光緒
中葉陳金海與某僧重闢未久仍廢近有兩僧團瓢於此茅屋數椽遊人尙堪憩
息

芙蓉菴在芙蓉嶺東腋距松谷菴三里菴爲太平溝村譚姓香火茅茨不剪樸陋殊
無可觀冒名芙蓉不免冤煞城主惟菴外栽桃千樹花時嬌艷可人聊堪爲凌波

仙子解嘲耳

松谷菴原名松谷草堂又名松谷禪林在疊障峯下宋末張尹甫先生避元亂隱此稱爲真人初居松山寺後駐老菴再遷此松谷其別號也因以名堂太平溝村李姓之祖與友甚篤故爲之造塔建宇奉爲香火明宣德間李德莊重建梵宇金貌紺象照耀人天宣歙池太鼎禮雲集遂以名菴菴額爲寧國府知府羅汝芳所書又題東土雲山四字堂後禘黃二字爲湯祭酒賓尹筆尹甫塔在座後天啓丁卯太平縣學諭陶珙作張松谷師遺草引安徽巡撫駱駘曾撰菴記咸豐兵燹俱爲灰燼光緒間李姓集資重建左增觀音堂堂左爲東古寺民國六年天台頂住持興雲雅樂清靜退居於此

東古寺在松谷菴隔壁前臨志成橋康熙間勅建爲十方叢林嘉慶二十一年重新大開期場演揚戒法後遭咸同兵火寺宇如墟寺前有石池瀦水內刻嘉慶二十一年東古寺創十字不署姓名莫明其故今李姓集貲共謀恢復古制由松谷菴住持興雲董其事已於民國壬戌開始經營矣

翠微寺在翠微峯下唐中和二年麻衣禪師自巴西來卓錫於此募洪氏山田建麻

衣道場得其麻縷可以療疾有飛錫泉遺跡南唐保太五年勅賜寺額明洪武辛未立爲叢林歷代以來迭有廢興至嘉靖間得佛悟等重修萬歷戊戌洪水衝毀寺僧本仕修之弘光乙酉僧心空從新重建尙書汪澤民中丞駱駿曾孝廉邵樸元俱撰有記湯祭酒賓尹題食堂曰隱翠清康熙戊辰僧超綱大加修葺並纂寺志一時名士高僧咸集於此至咸豐初香火猶盛間能開期自被赭寇盤踞寺燬爲燼迨同治五年僧本微來山結茅遍叩山下洪村社諸居民助款捐工建築左室而大殿仍付缺如民國五年四月金陵二郎廟邵道人飛杖至此殿宇一新暫改觀名使其徒宛道人在此修持計居十年恪守玄規能耐勞苦寺前及上塢腴田二十四畝自種自食竊願雲水高人不自望崖而返近換宗教兼任則寺之方興正未有艾也

潘之恆云客問翠微何以稱勝余曰由萬峯得一峯則孤勝由百境會一境則幽勝翠微之在黃山猶雲中鶴淵中龍咸藉珠光自耀又客語余曰黃海諸峯與翠微不可以大小尊卑論矣在翠微則黃海諸峯伏而不見見黃海諸峯則翠微亦

隱大小尊卑之若相攝而不相乘相避而不相凌也固如是哉可謂善言山之概矣湯太史題食堂曰隱翠其亦有會心乎

釣橋菴在湯嶺北十里許介兩橋之間明某道人所建旋燬於兵清康熙初年僧神立復造厥後興替無常半修半圯咸豐間嶺南橫坑菴嶺北航海菴俱被兵火其間山徑險澀四十里無人煙行旅經此不惟寂寞尤恐意外之危菴下陳姓捐貲重修輪田施茶奈菴室狹小不堪棲息遊人陳居士仁梅於光緒庚子築亭翼之民國癸亥更偕族人吉祥捐金三百餘增建數椽重爲修飾內爲經堂外爲茶室邢邑侯鳴盛爲之作記鐫珉前由常州玄妙觀韓道人蘭圃退居於此後雲遊而去今歸脫塵和尚派僧接住

繼竺菴在苦竹溪俗呼丞相源脚菴乃雲谷寺之下院也昔年僧人務農菴中多置農器雖菴如農家服男稼禾三百塵輪將本寺作供十方咸同兵燹後山僧寥落此菴爲當地所有民國甲子僧宗教將此菴收爲獅子峯中五台之別築修整供佛如遊人在此憩息亦頗爲雅

始信茅蓬距始信峯里許在獅子峯往始信峯路側民國乙丑秋九華僧心堅退居於此刈草代木經營伊始菴名尙未碇定現由其徒本宣住此

城山觀在翠微峯下宋司戶焦源建爲黃山堂堂面山臨流解元焦頤重葺扁曰城山書院兩子魁文武榜後人有詩云山川可隱神仙跡草木猶馨文武名今改爲觀祠玉虛真人每年三月上巳賽會其上

亭 凡二十二亭

扁擔亭在查木嶺南距湯口二里許徽屬六縣入山俱由此亭

百零亭在芹萊嶺中因嶺上至此有級百零故名上至湯口二里下至苦竹溪三里此爲丞相源桃花溪往來之郵

逍遙亭在逍遙溪塆上對清潭峯距湯池四里溪中諸潭最爲清雅

聽濤亭原名得心亭在慈光寺山門內距寺里許北土一山空天積翠慈光寺也亭

高踞坡頭化城未真梵天猶俗人人急須進步此中尙非安身立命之鄉亭早圯

場民國六年慈光寺僧雪嶺重建改今名亭書一聯云過此成仙侶回來無俗人
同仁亭在丁巳社同仁橋上首爲烏坭嶺往來憩息之所傍山而築

排亭在檻窗峯下長嶺上太平胡用建捐田十畝煮茶濟衆民國八年胡敦睦堂重
建

問余亭在碧山胡家近夫子峯唐李白訪尙書胡暉至此問路後人築亭於此卽名
問余

南陽亭一名義姓亭在夫子山脚上距福固寺五里遊神仙洞可先小憩於此

慶雲亭在松山寺後老瓦培李慶之妻承夫志以建之李涯爲之記

秀水亭在虎嶺中亭旁石壁四季出水久旱不涸原名出水亭後改今名水味甘美

清冷異常亭爲松山寺至松谷菴必由之徑

芙蓉亭在芙蓉嶺下由太平輔村北上黃山者須緣亭而往尙書汪澤民爲之記

松谷亭在松谷道中嘉慶十八年被蛟水衝沒二十四年僧鑽堅募貲重建亭在烏

龍潭上志成橋下至此可望松谷菴

下劉門亭在松谷道中高巒浚壑布置天然下距松谷菴五里光緒間崔忠元重修中劉門亭在下劉門亭之上相隔五里許憩時可眺仙人觀榜之景

上劉門亭一名如意亭乾隆丙寅劉景洲所建嘉慶辛酉景洲之子苞萌克承父志換石重新以垂永久有碑紀其事

復興亭在翠微寺道中汪尙書澤民題翼然二字於上民國壬戌重修宛道人換書方來亭三字

半仙亭在伏牛嶺頭上達吊橋菴下通栗溪坦皆五里初爲下馬山焦某所建光緒初陳仁銓重修

海雲亭在吊橋上二里半前對天海爲山所隔常見白雲墳起故名

新菴亭在湯嶺北下五里亭傍新菴而築今新菴已圯亭名仍舊呼之

碧雲亭在湯嶺北下亭繫嶺腰視之卽在目前口稱二里半實不足一里下嶺者於此多毋須息焉

橫坑亭在湯嶺南下五里近橫坑菴菴乃咸豐兵燹時所燬湯嶺南下至茅蓬菴計

十里中途無亭遊人遇雨何堪受此故太平好善者釀金建之

招隱亭在丞相源白沙嶺上獅子峯往雲谷寺必由之處李居士法周重建

橋 凡三十七橋

回龍橋在羅漢級下天都峯東溝中溝兩水皆由此而下桃花溪東往茅蓬菴西達

慈光寺

小補橋原名臥龍橋一名湯院橋古刹香泉分麗兩澗過此可尋桃源諸勝乾隆間被水衝沒道光四年旌人方錦賢偕友褰裳而過卽發願釀金重建閱五月而竣

因尋幽探勝者必由此橋以小補游山之興因名之曰小補朱德芳爲之記

鎖溪橋在紫雲菴往湯口道中有二小坑雨後亦成溪澗黟縣汪居士蟾清歙縣

程居士霖生修路至此連築三橋委僧性海督其事以鎖溪口而利游人故名

折桂橋在湯口村中

湯口橋三洞宏治己酉程姓所建天都老人爲之銘俗稱龍門橋

仙源橋俗稱輾橋頭捲橋在金絲嶺下苦竹溪上從湯口來者踰金絲嶺過此橋至脚菴上丞相源橋畔數家蕭然有流水孤村之致

披雲橋在慈光寺大殿前康熙丁亥海陽信官程岳鼎造

度生橋在中溝距半山寺二里民國甲子春陳吉祥修此路並破二石以築之橋成之際適蝦蟆先跳而過故名

仙人橋在文殊院一線天下有石磴可憩仰視天都猶在霄漢俯察深壑邃谷如流九淵

斷凡橋橋架絕壑上下臨不測蓋普門棧山尋夢處也

慧明橋在獅子林往始信峯途中青松環繞清幽獨絕民國乙丑太平王居士森甫造

度仙橋又名仙人橋在始信峯脰中駕一石橫於兩崖狀若飛虹橋畔有松根長北嶙幹依南嶠橫迤如欄曰接引松

緣成橋在松谷菴上一里許民國壬戌黟縣汪居士蟾清捐築李居士蓮華監造

志成橋在松谷菴前民國壬戌秋譚居士芝屏出千金與僧興雲監造陳廣文之謝以譚居士篤信佛教曾蒙佛錫以志佛嘉名橋以濟人成佛之志故以志成名其橋並爲之記

益壽橋在芙蓉嶺南下第二橋李澄侯爲病求松谷神至此阻水望空遙禱而返未幾卽愈築此橋以償願故名

陳公橋在芙蓉嶺南下第一橋康熙二十六年邑侯陳九陞捐貲築成後人以陳公橋呼之

芙蓉橋在芙蓉嶺北距芙蓉嶺三里許

二龍橋在松谷菴腳下一河兩橋北橋乃明成化間所造南橋係民國甲子江寧李居士蓮華募建

成德橋在輔村團家河庠生任重建任重父喪廬墓承志造橋陳邑令獎曰篤孝醇行

竟成橋在太平南鄉之輔村距芙蓉嶺十里原係架木爲梁名周家橋乾隆初年輔

村李厚改建石橋有星士相之云此橋須逾十八年建石橋方爲永久厚爲善心切亟不及待甫竣工而黃山蛟水勃發爲洪流衝毀至光緒辛丑任學邦又以木橋常被水患爲慮復建平石橋五洞以竟成鄉先哲之志故名崔太史錦中爲之記

大成橋在輔村水口乾隆間閣村醮資李曜手建光緒中葉穆梧岡重修民國初復修之

麟趾橋在福固寺前僧人呼爲呂公橋又稱狀元橋爲宋呂侍郎溱所建年湮無考不知確否

福緣橋在軒轅峯下尙書里福緣菴下首

重興橋在福固寺東角上神仙洞必由之橋昔造未竟民國癸丑僧能學募建完竣橋東有平石橋乃巷里陳姓所造

虎頭橋在虎頭巖上距紫雲菴一里許澗激石獐大助於菟之勢文殊臺蓮花溝諸水俱從此而下

陳家橋與虎頭橋相近湯嶺南水經此而入桃花溪

鳴絃橋在湯嶺南路鳴絃泉下

橫坑橋又名太平橋在湯嶺南下香溪上流距紫雲菴五里近橫坑菴故名太平西鄉陳姓所建溪中一大石界水分流爲溪砥柱北望仙石橋梁洞歷歷其橋下之

水由百步雲梯而下

雲門橋在湯嶺南下雲門峯東水由此而入白雲溪故名

白雲橋在湯嶺南下流入白雲溪故名

新菴橋在湯嶺關北距關五里

乾坑橋在湯嶺北下雲門峯北水出此而下續古橋

青雲橋在湯嶺北

續古橋在鈎橋菴左焦秀獻建

壽延橋在鈎橋菴右宏治八年太平西鄉陳員孫男勝安等建

方源橋在伏牛嶺南下里許

翼然橋在翠微寺前

坊一

黃山勝境坊在苦竹溪兩江總督高晉於乾隆二十二年奉上諭擬親躬來遊故趕先建四柱石坊壹座上鐫黃山勝境四字以爲黃山接駕之門

塔 凡八塔

志滿禪師塔在祥符寺後龍唐大曆丁未南遊至此露宿雲嶺山蟲繞衛枯坐數月不知飢渴往來者以佛名之故更名佛嶺於湯泉結茅而止

麻衣祖師塔在翠微寺山脚四面五級高聳三丈係唐中和三年麻衣祖師所建故名

松谷真人塔在松谷菴內與夫人同塔高五層自宋至今猶威靈赫濯
普門和尚塔在慈光寺大殿右脇有塔銘顧太史鼎臣撰

寓安大師塔在丞相源有塔銘憇山老人撰

斷山老人塔在慈光寺大殿東脇有塔銘吳探花孔嘉撰

星朗和尚塔在慈光寺山門有墓誌銘汪探花廷璵撰

壁菴大師塔在雲谷寺山門外路下右邊王山丙向壁菴名志正卽嘉魚縣光祿熊
開元也

墓一

江麗田先生墓在丞相源龍鳳菴間癸山丁向麗田乃清乾隆時隱居此山鼓琴自
娛

黃山指南卷下

異產 凡四十一種

黃海散人著

按黃山綿亙古稱五百里峯高谷邃岩峻潭深物產一類蘊蓄必富予編山志計箸四百種茲僅採其稍異者載之要窺全豹請閱黃山志物產類

神鴉黃山有二鴉形似鳥而稍大平日飛繞峯頂各寺院有貴客至則先期向僧疊鳴見卽預備菜蔬以俟之屢試屢驗清順治間斷山老人爲慈光寺方丈時命名爲傳書傳信呼其名卽就掌取食客遊山鴉背行而先若引導者

山樂鳥棲止山中其鳴如樂故名山樂背蒼腹黃毛色美麗八九成羣山中時見而蓮花溝一帶尤多鳴聲清越如笙簫有節奏有疾徐春至則雛或曰頻伽或曰鸚鵡誤矣武昌崇陽縣巖頭寺畔亦有之每日五更必鳴其聲清飛翔不出數里外惟歲止見一雙與此少異耳唐張燕公有時樂鳥詩疑卽指此西陽雜俎亦載之畫眉身小如鷹色蒼綠腹淡黃眼角有白毛如眉故名雄者鳴聲清越性喜鬪處處

山林有之而黃山所產者尤勇健絕倫好事者以媒取之不啻連城之璧

竹雞狀如小雞無尾色褐嘴短多斑赤文其性好啼見儔必鬪蜀人呼爲雞頭鶻南

山呼爲泥滑滑因其聲也蓄之能制白蟻諺云數聲泥滑滑白蟻化爲泥環山竹

林中多有之惟啼聲較他處所產爲延長

黃鸝體黃羽及尾有黑色相間皂眉尖嘴青脚仲春卽鳴榘熟時尤甚其音圓滑如

織機聲乃應節趨時之鳥也詩經曰黃鳥爾雅曰鶯黃月令曰倉庚黃山春夏間

常聞之入冬遂不見是說文所謂冬月藏蟄入田以泥自裹之說信不誣矣

白猿形狀似猴有鬚前二足長有長尾其臂通與猴異能以手相接縋崖而下暖姝

由筆曰南豐猿小如拳曾在良籌峯見之檣與齋言粵東見石猿如拳舊說猴小

猿大似不足信山海經載常庭之山多白猿黃山則僅見其一常在蓮花峯腰或

獨遊諸峯之頂不與衆猿爲伍踞石如雪普門呼爲雪翁出沒不常見之者少山

僧稱爲神猿其他猿每結羣而至數之必九十九近年黟孝廉胡思邁曾遇之又

有一玄者身大鬚長不畏人時往來天都峯下

白鹿馬身羊尾頭側長脚高而行速牡者有角夏至則解殷仰堪云鹿以白色爲正述異記云鹿千歲爲蒼又五百歲爲白又五百歲爲玄故又名仙獸舊志及古人遊記咸稱曾見之石人峯下然則昔之見爲白者今不幾爲玄乎今之見爲白再數百年不又爲玄乎若常鹿則黃山甚多黃質白斑牡者無角小者無斑山民呼爲馬鹿藥肆所稱仙鹿是也

白額虎狀如貓大如牛黃質黑章鋸牙鈎爪鬚健而尖舌大如掌生倒刺項短鼻鼷夜行一目放光一目看物聲吼如雷風從而生百獸震恐格物論稱爲山獸之君宜矣黃山自昔有白額虎因額有白毛故名之非別一種也相傳常在慈光寺普門僧座前聽法僧圓寂後間日猶來皆以夜足跡如碗又擲鉢院僧寓安嘗夜行遇之徑前摩虎頭屬之虎戢尾受戒不動不吼人咸異之今丞相源一帶常見足跡從不傷人殆受戒之說爲不虛矣

山羊似羚色青或黑但角無挂痕爾雅所謂羴羊也一種大角盤桓一種角細有節善鬪能陟峻坂猿捷異常常見之于九龍缸蘇名流黃炎培曾在蓮花峯西亦遇

之其皮厚其肉肥其血能治傾跌諸症山民苦茅藏雪中布網捕之挺擊至死擊愈多則血愈盛

猴狀似人眼如愁胡而頰陷有曠可藏食物腹無脾以行消食尻無毛而尾短手足如人亦能豎行聲嗚嗚若欬好拭面如沐故曰沐猴後人訛沐爲母又訛母爲獼失矣黃山之猴皆成羣或數十或百餘藏居西海每至秋間環山尋食不畏人人亦不敢擊之按猴類甚多曰虞曰獾曰猯曰獠曰果然曰蒙頌狀相似而略殊山僧皆以猴呼之

龍鱗蟲之長玉符言其形有九似頭似駝角似鹿眼似兔耳似牛項似蛇腹似蜃鱗似鯉爪似鷹掌似虎是也能大能小忽升忽潛呵氣成雲騰空致雨小說載龍性粗猛畏鐵及菑草祈雨者投以鐵或用菑激之立驗黃山諸深潭皆有之而鐵線潭三墳潭尤確爲龍潛之所宣歙二州祈雨者每當赤日青空時以器竊取潭水則疾雨隨之雲雨中恆見其張牙舞爪勢極可怖必傾水而後已宜其爲神物矣白龜形如龜大如銀幣背甲如白金底甲如象牙眼赤頭尾皆白色置之水中

澤近年有二人曾於山澗中各得其一博物家無有能名之者諸書亦均無可考惟錄異記云唐玄宗時方士獻徑寸小龜金色可愛置碗中能辟蛇虺之毒與此形色略同大抵皆龜之異者也

錦鱗魚生逍遙溪亂石間形長體圓細鱗玄色斑點花紋聚族濺濺碧波中比之朱鰲金鱗更爲豔秀山僧因其文采斑錯呼爲錦鱗魚殆卽文魚之類歟

石蜜蜜蜂之巢于巖石者黃山諸崖多有之採花釀蜜色白如雪而味勝桶蜂故一名巖蜜亦名白蜜蘇恭謂以牛乳沙糖製者亦名石蜜此既係蜂釀宜去石字寇宗奭亦謂石字爲白字之訛蓋新蜜稀而黃陳蜜白而沙也換本草綱目云石蜜生諸山石中色白如膏是蜜應以山蜂釀于崖石者爲佳蘇氏不考而欲去石字寇氏又不知真蜜白沙而僞蜜稀黃但以新陳立說並誤矣

朱砂卽丹砂蘇恭言丹砂大略可分兩種一土砂一石砂黃山所產皆石砂也山中有在在之而以朱砂峯至湯池已屢次發現其大塊者如雞子小者如石榴子狀若芙蓉頭箭鏃連牀者紫黯若鐵色而光明瑩澈碎之巖岩作牆壁形識者謂不

遜辰州所產

黃炎培云黃山以產朱砂著名朱砂在化學上名汞硫蒸汞硫於空氣內得汞其用可製寒暑表風雨表塗於玻璃可製鏡以照影能於鑛物中吸出貴重金類又供精製金銀之用於化學上頗占重要位置聞墨西哥首尋得汞者乃一僕人於山頂折一小樹之枝見根下有水流出驗之卽汞余於黃山嘗倚枯松偶折其枝中盡赤色之朱砂其根亦然考黃山之得名以黃帝嘗煉丹於此今尙存鍊丹台故跡雖事荒唐然山之富於汞養可想紫雲峯下溫泉志稱其含砂質實則朱砂內固含硫也惜此汞硫無人采以供世用耳

香砂出天都峯頂小池夜放光蓮花峯月池中亦有之氣味清香彷彿蓮桂然不能常見有時舉手卽得一時徧求不得蓋神物也

引針石出引針峯下色黯黑類吸鐵石能引針使南指然有時又徧東而不定南按鐵受太陽之氣而生亦石產焉可五十年而成慈石又二百年而成鐵矸氣類相感係吸鐵石之一種歟

浣火石形若五色砂石團結而成者出蓮花澗碎而熬之有聲有光如金在鎔五色
散射如佛頂圓光故曰華錄名菩薩石丹爐家煨制作五金三黃匱若種痘疹欲
出不出以此熏裏衣衣之立發可保無虞此石特不多得置水中則色白如雪一
名天花石又名放光石或曰含有硫質理或然歟

水晶石出天海西隅石壁井中晶石環山間有晶井近年發現晶向日照之光瑩五
色澈若泉清凌侍御駒勇于山澗中拾得一枚慈光寺僧云近年有一遊客于仙
橋下得之清明而瑩置水中不見按山海經謂之水玉係水中之精故又名水精
紫芝瑞草也生軒轅峯下爲九莖爲三秀其色紫亦有青赤黃白黑諸色別錄云青
生泰山赤生衡山黃生嵩山白生華山黑生常山紫生高夏山陶宏景謂郡縣無
高夏當是山名雖未敢臆斷爲黃山然紫芝實爲黃山特產若今俗用之紫芝係
朽木株上所生與此迥異神農經云山川雲雨四時五行陰陽晝夜之精凝生神
芝葛洪抱朴子云飛節芝生千歲老松上皮中有脂狀如飛形服之長生黃蘗芝
生千歲古蘗根下有細根如縷服之神仙黃山多老松古蘗宜其生此瑞草也今

軒轅峯下有紫芝源尋之間有獲者

紅朮生丹霞峯下紅朮源其莖葉花皆如白朮堅結細膩亦相同但作赤色朮有兩種白者葉大有毛而作極根甜而少膏紅者葉細無極根小苦而多膏

黃精二月始生一枝多葉葉狀似竹而短兩兩相對莖梗柔軟頗似桃枝本黃末赤四月開青白花狀如小荳子白如黍粒亦有無子者根如嫩薑色黃山僧八月採之九蒸九曬色黑味甘瑞草經名爲黃芝五符經名爲戊己芝陶宏景名爲仙人餘糧陳嘉謨蒙荃名爲野生薑按張華博物志云昔黃帝問於天姥曰天地所生有食之令人不死者乎天姥曰太陽之草名黃精黃山所產最佳食之可以長生即此

萬年松草本生天都蓮花諸峯懸崖上長三四寸葉似書帶草略厚凌冬不彫連根拔取雖乾枯後栽之蒼翠如新復收歷數十年栽之亦如是故俗名還魂草按拾遺記所謂石松又名玉柏者是也

龍鬚草生龍鬚源暨望仙諸峯下叢生狀如鳧茈長可三四尺無枝無葉色綠乾黃

柔軟而勁可以織席圖經稱黃帝乘龍上昇羣臣拔龍鬚墮地所化崔豹古今注亦云然語殊妄誕按此草織蓆最良名西王母蓆豈又王母騎虎亦墮其鬚乎述異記稱周穆王養八駿處有草名龍芻殆卽此歟

三七葉似菊艾莖有赤稜生獅子峯鐵線潭一帶采根暴乾色黃黑略似白芨長者如地黃有節味微甘而苦或言其葉左三右四恐不盡然俗呼金不換蓋言貴重難得也治金瘡折傷有神效李時珍綱目稱此藥近出南中諸山軍人用爲金瘡要藥有奇功卽此

菖蒲生山中水石上不著沙泥葉似韭有劍脊根如匙柄春間抽莖開細黃花成穗應劭風俗通云菖蒲花食之長年昔人言菖蒲無花誤矣日華曰石澗所生堅小一寸九節者出宣州黃山爲菖蒲中上品

山韭生丞相源澗畔形色類韭長三尺許根白葉如燈心苗俗稱黃山出仙韭卽指此也按爾雅云藿山韭也許慎說文云鉞山韭也金雅攷北征錄稱雲台戎地多野韭甚長人皆采食殆卽此也又呂忱字林稱水韭野生水涯葉如韭而細長可

食觀此則野韭有山水二種似不得專以山韭名之

黃楊木枝葉攢簇上聳似初生槐芽而青厚不花不實不彫性最難長俗說歲長一寸遇閏則退古所謂黃楊厄閏是也其木堅膩作梳剗印最良西陽雜俎云世種黃楊以其無火也黃山西海中產有一種矮而翠山僧呼爲珍珠黃楊四葉攢簇而不上聳色黃綠中嵌碎粒枝繁而脆尤不易長殆黃楊之一種歟

竹黃山在在有之而紫雲菴前高而且大種類甚繁卽山僧亦不能盡別大抵皆地中苞筍各以時出旬日解籜而成竹也莖有節節有枝枝有節節有葉葉必三之枝必兩之根下之枝一爲雄二爲雌雌生筍其根硬喜行東南六十年一花花結實其竹則枯曰葍竹實曰籊有箠竹淡竹苦竹甘竹苗竹蕩竹篠竹等名其用甚溥戴凱之竹譜云植物之中有名曰竹不剛不柔非草非木小異實虛大同節目是竹確有實心一種桃花源亦有之堅實犀銳可爲武器

異蘿松在丞相源雲谷寺前後兩株同幹異葉乃翠柏與蒼松黃楊木合體施於高枝並不著土嫩綠深藍濃陰滿院蓋數千年物也

麒麟松在獅子林左形如世俗所繪之麒麟蒼翠可玩

鳳凰柏在獅子林後世所謂祥麟威鳳者想不過爾爾

奇松松江南諸山皆有而不及黃山者佳好黃山松皆生石崖縫中不著寸土入山愈深則松愈古形狀亦愈奇有矯如龍盤如虬昂如鶴立如人偃如雨蓋臥如扶欄者不一而足其最著名者如文殊院之迎客松始信峯之接引松平天砭之棋枰松蓮花峯下之倒挂松清涼台傍之破石松蓮花嶺上之連理松鰲魚洞上之雨蓋松大士崖之蒲團松散花塢之擾龍松夢筆生花松皆千年外物以形錫名以故黃山無處不石無石不松無松不奇環山皆有山僧不惜工資取之以贈遊客

雲霧茶生黃山眉毛峯爲最桃花峯湯池傍次之吊橋丞相源與松谷菴芙蓉嶺相伯仲黃山之茶常有雲霧罩之故名味極清香一經水泡雲霧滿布如有食滯飲之立見消除惟眉毛峯崖懸徑險草木繁密鷲獸時出雲霧尤爲常蔽故人罕到夏初發芽長三四寸斷之有白綿如杜仲僅數十株味更香美不易得也查毛文

錫茶譜云蒙山有五頂皆產茶其中頂名上清峯昔有僧久病冷一老人謂曰上清峯頂之茶若獲一兩可祛宿疾二兩百病消除三兩能固肌骨四兩卽成地仙矣僧如述獲數兩服之未盡而瘳按此當與黃山眉毛峯之雲霧茶並爲茶中特品彼雅州之蒙頂石花露芽建寧之北苑龍鳳團蜀川之神泉獸目硤州之碧澗明月誌其地點並錫嘉名雖皆稱爲上品對黃山之茶當拜下風矣

黃連苗似茶叢生三月抽莖高尺許葉似甘菊四月開花花細成穗淡白微黃六月結子似芹根若連珠而色黃故名黃山所產凌冬不彫本草稱生宣州者名宣連寒而不滯入藥最良陶宏景亦謂黃連以宣州九節堅重相擊有聲者爲上歙州次之黃山爲宣歙中堅靈氣所鍾所產自係上品矣

雲霧草或生松上或生峭壁出觀音巖石人峯爲最狀如亂絲其色翠綠寄生不粘寸土惟飽雲霧寒味微辣能治疫癘泡水洗目疾尤效山僧採取陰乾以贈遊客青筍亦竹筍之一類黃山竹類甚多故筍類亦多桃花峯湯池墉所產味尤腴美四月始生較他筍稍遲色青故名爲饌中珍品山僧取之焙乾置鹹淡兩種以贈遊

客

石衣生懸崖絕壁高處乃受陰陽雨露之氣漸漬石上年久則生蘚衣翠碧望若流
煙乾者背黝黑面白山民用以作羹爲山蔬第一珍品本草綱目謂天台四明皆
有惟宣州黃山者最佳但非山居人不能取有專操此業者向深崖危壑人跡莫
能攀躋之處法用藤兜繩絙趨捷如猿取之味甘氣清食之男子益精增髓女子
潔子宮易受胎舊志載昔有取者覺奇寒陡逼諦視見神龍方睡鱗角儼然爪尾
蟠抱頷珠大如拳光彩不可逼視亦一奇也俗呼爲石耳按石耳一名靈芝狀如
地耳山中亦有之品味殊遜

野白朮一莖直上高二三尺其葉長尖偏有針刺紋花如小薊或黃或白伏後結子
秋而苗枯根似薑旁有細根膚理細膩切之間有朱砂點者其功力較他山所產
不啻蓍蕀但甚難得山僧每購種朮栽諸山中數年後取之其功力不及天生者
之宏天然猶佳於他產野朮也近年安徽倪督嗣冲黃省長家傑暨諸當道屢委
員來山採辦本草綱目稱野朮產於潛縣鶴山者爲第一頗不易得價論八換若

準以黃山天生野白朮猶不止此則其功力可知矣

香蕈生古樹上或樹陰處乃溫氣薰蒸而成芳香味美俱絕采之莖之至腴能治洩濁不禁之疾他山產者柄高而香不及又有鷄足蕈形色與此略同乃毒氣所感而生食當慎之近有浙江人在山下斫雜樹以人力生者亦稱香菰氣味頗佳毫無毒質實素菜中之珍品故山僧購之以贈遊人

木蓮菓樹高數仞凌冬不彫身如青楊皮薄有白紋其心內黃故又名黃心葉深綠如桂而厚大無脊四月初始花二旬卽謝花如蓮花其瓣九出色白縷紫濃香馥郁其實朱色狀似豬心實含苞內苞開實出若珊瑚新琢昔祇慈光寺一株今紫雲菴前亦有秋間山僧采其果實餽贈遊客意甚珍重惟能治心腹諸疾按白樂天集云木蓮生巴峽山谷間呼爲廣心卽此也又一種名石連花時瀾漫山谷盈目皆香雪但瓣五出又不實耳

遊客須知

一 黃山方位以光明頂爲中央以文殊院半山寺慈光寺紫雲庵桃花峯爲南部以獅子峯松谷庵芙蓉嶺松山寺爲北部以丞相源雲谷寺九龍潭苦竹溪爲東部以釣橋庵翠微寺城山觀爲西部神仙洞福固寺在黃山之東北洋湖缸洋湖庵在黃山之西北雲門峯浮丘峯在黃山之西南清潭峯湯口在黃山之東南此黃山方位之大略也

一 入山游覽先閱是書路程次閱入山沿路風景遊客所需之物爲黃山指南棉夾衣服日記簿羅盤針鉛筆手錶熱水瓶窺遠鏡行杖雨具茶食乾糧前一日預備完全臨行時再檢點之能攜手提照相器沿途攝影尤佳

一 遊山濟勝之具惟腰與脚健步者可在入山初宿之庵中僱沙彌或勞工一人爲導並將上列各物令其肩之日給酬資銀幣五角至一元

一 遊客之不能徒步者即在入山初宿之庵中僱勞工二人乘兜子而往全日酬資

以銀幣計每人約五角至一元按日計算行李較多另僱一人挑之隨兜而行以便沿途取用

一遊山切忌趕速世外桃源祇能與知者道欲探奧妙儘可緩步徐行悉得領略如由南入山第一日住紫雲庵第二日住慈光寺第三日住半山寺第四日住文殊院第五日住獅子峯第六日住松谷庵第七日由松谷庵往芙蓉嶺至北境一遊回歇松谷庵第八日旋獅子峯第九日下丞相源住雲谷寺第十日觀九龍瀑布由苦竹溪越芹菜嶺過湯口回紫雲庵沿途名勝已載路景茲不再贅仍有神仙洞洋湖庵翠微寺釣橋庵諸處未遊如有暇再作七日遊第一日由紫雲庵下湯口踰苦竹溪過烏泥關觀布水峯至排亭觀檻窗峯以及怪石嵯峨諸景歇譚家橋旅店第二日過感梓里長源里至屹溪橋隨河而上繞碧山羅家尋太白書院古蹟躡問余亭勝境越大戰嶺望黃帝坑上神仙洞居福固寺第三日下夫子山脚過巷里踰松山寺寺頗幽雅內懸名人所書匾額五十餘方筆勢雄偉蒼老秀拔無體不有當晚過虎嶺歇輔村旅店第四日上洋湖住洋湖庵流覽湖景及九

龍缸芙蓉引針諸峯第五日由洋湖缸至翠微寺第六日下山繞軍田里過栗溪坦上伏牛嶺住釣橋庵第七日踰湯嶺返紫雲庵前後遊程如天晴十七日可畢若每寺流連兩宿約須四十日全山風景領略大半所遺者惟西海浮丘丞相東源石筍缸諸處而已

一山下四處村落皆無轎行遊人乘轎須直抵山寺鄉間雖有散轎可僱然價格甚昂近年黃山僧人皆講究優待遊客俱辦兜子卽以庵中僱用之勞工擡之山徑已漸修整遊客不能徒步者皆可以入室登堂矣

一山中無飯店遊人遇寺投宿山僧招待較昔殷勤盤殮六八皆屬素饌尙堪適口房伙任遊人酌給並不計較

一黃山湯池溫涼適宜真天然之澡室遊人至山須先一浴以脫塵垢而入仙山

一遊山宜三月起至九月止惟霉天多雨須預防之凡平地越熱遊山越宜春冬不宜者有三一忌雨雪連綿不能上山二忌寒冰滑溜不能舉趾三忌山風澈骨不能抵禦夏秋遊山雖宜宜備三多一多帶棉衣二多備食料三多結同伴棉衣防

風雨而禦寒食料防延期而充飢結伴防鋪海而失迷以上三忌三宜遊人須注意焉

一遊山莫怨雨遇寺便投宿此詩吟之頗有味如遇雨須俟天晴步履爲快風景易觀雨固不宜陰亦不宜黃山天陰卽有雲霧瀰漫雲霧退則峯巒畢具雲霧來則對面不見如遊人遇雲霧恐有失迷之患不可不慎

一在黃山避暑最相宜者莫若紫雲庵之前廳慈光寺之東閣窗虛軒朗名勝羅列又近湯池便於洗澡又湯嶺大道由庵前經過添購食物不費周章

一在獅子林清涼頂避暑亦佳且有一最怡情之事清晨傍晚可登清涼臺始信峯諸處觀雲海

一在松谷庵福固寺避暑清溪幽僻各有其妙

一文殊院不宜避暑因屋小而天氣太寒

一翠微寺釣橋庵亦不宜避暑因庵在山下未能領略山中風味

一雲谷寺半山寺大悲院諸處避暑亦宜

一 黃山氣候低寒故植物萌茁亦遲假如平地熱度九十而黃山之慈光雲谷釣橋松谷四處祇八十至文殊院獅子峯又祇六十五度如風雨之下尤爲寒冷山下杜鵑清明時節遂着花山上則立夏尙含苞未放可見氣候之寒

一 黃山寺院往來不一徑惟山西之翠微寺山東之神仙洞與他庵不通勢成獨立而往來亦由原道

一 昔年游客至山多不識路須僱住庵之傭工或沙彌引之孰知傭工沙彌亦多係新來之人游客隨路亂問引者卽隨口亂答故數百年峯巒部位被若輩顛倒錯亂殆盡卽文人遊記亦多舛誤皆因以訛傳訛良可歎也閱名人遊記文字雖佳考據失實比比皆是

一 今日所著黃山指南峯巒部位業經考定游客攜此而往再邀一久住山中之僧同遊一經點撥無不全山皆知

遊客路程

黃山在歙縣之西北在太平縣之西南黃山四方部位以苦竹溪爲東部以湯口爲南部以栗溪坦爲西部以輔村爲北部東南屬歙縣西北屬太平縣此爲黃山四方入山之村落也山中平天砭卽歙太兩縣分界之所 由徽州府所屬歙休婺績祁黟六縣來遊者直至湯口入山以紫雲庵爲憩息所 由寧國府所屬宣南寧涇旌太六縣來遊者踰太平南鄉繞山東苦竹溪而至山南湯口入山亦以紫雲庵爲憩息所如至苦竹溪村中西入黃山勝境坊上丞相源以雲谷寺爲憩息所 由太平縣城區及南鄉來遊者亦同 由太平縣甘棠及西南鄉來遊者直至輔村入山以松谷庵爲憩息所 由太平縣西鄉來遊者繞山西湯嶺而至山南慈光寺山門亦以紫雲庵爲憩息所 由和悅洲青陽九華山石埭縣來遊者有二路一過穰溪河至甘棠由北直入越輔村以松谷庵爲憩息所一過娘嶺至焦村繞山西而至山南以紫雲庵爲憩息所 黃山遊程山外雖四方皆通山內

僅南紫雲庵北松谷庵東雲谷寺三徑往返黃山形勝本以光明頂爲中央因頂下蘭若

荒未修築遊客憩息之所暫定以獅子峯爲中點因獅子峯與光明頂相去祇五里 北路自輔村經松谷庵 南路自湯口繞紫雲庵慈光寺文殊院 東路自苦竹溪經雲谷寺而皆會於獅子峯 西路自栗溪坦踰吊橋庵過湯嶺至慈光寺山門與南路合徑而上 遊覽黃山名勝或由南路而至北路東路或由北路而至東路南路或由東路而至南路北路各有奇妙聽遊客自擇 惟山西之翠微寺山東之神仙洞與山中道路不通勢成獨立 方黃山路徑未開歙遊者多取道羅漢級躡天梯而上宣遊者多取道白雲庵循指象處而下昔日之山徑危險可想而知

山外路程

歙縣由西路至黃山湯口計一百一十里

歙縣	至	十里	鄭村	至	十三里	唐模	至	七里	潛口	至	五里	佛子嶺	至	五里	楊干	至	二里	黃山谷口	至	三里	容
溪	至	五里	上舍	至	三里	牛頭口	至	四里	長潭	至	三里	下舍	至	十里	山口村	至	五里	石肩灣	至	五里	楊
村	至	五里	胡村	至	五里	金竹坑	至	五里	東坑口	至	五里	芳村	至	五里	寨西橋	至	五里	湯口	至	湯口	

口俗稱九
口八十里

歙縣由北路至黃山湯口計一百三十一里

歙縣十五里至富場十里豐口十五里許村五里峻嶺十五里茅舍五里茶坦五里箬嶺頭此至

與旌德太平兩縣會合三里至樂得坐即豐濟庵入太平縣境七里至八里岡三里騎龍庵八里箬嶺脚五里文

堃街五里潭家橋三里桃嶺汪家四里排亭三里黃絲境入歙縣境五里至烏泥關五里

上張五里苦竹溪五里湯口

休寧縣由東路至黃山湯口計一百一十里

休寧縣五里萬安街三里後村二里露露嶺三里上塢一里穎里五里慶霞三里琶

村石橋三里烏坦入歙縣境五里潛口五里佛子嶺五里楊干二里黃山谷口三里容

溪五里上舍三里牛頭口四里長潭三里下舍十里山口村五里石肩灣五里楊

村五里胡村境五里金竹坑五里東坑口五里芳村五里寨西橋五里湯口

休寧縣由西路至黃山湯口計九十七里

休寧縣四里鄧庭三里觀音閣五里瑯琊五里新亭三里冷水亭五里迪祥胡五里

鶴嶺至五里 南塘至五里 藍田至五里 裏子坑至五里 儒村至五里 高橋至一里 王村頭至五里 雙嶺脚至二里 雙嶺頭入歙縣境 上岡村至一里 岡村至五里 小嶺下至五里 寨西橋至五里 湯

口

黟縣至黃山湯口計七十九里

黟縣至七里 石山至八里 西遞至十里 八都團口至五里 朱川至五里 虎嶺頭入休寧縣境 七里至儒村里

至高橋至一里 王村頭至五里 雙嶺脚至二里 雙嶺頭入歙縣境 上岡村至一里 岡村至五里

小嶺脚至五里 寨西橋至五里 湯口

祁門縣至黃山湯口計一百三十九里

祁門縣至十里 華橋至十里 牆里至十里 柏溪西武嶺至逾里 官路下入黟縣境 五里至古築至十里 黟縣

城至七里 石山至八里 西遞至十里 八都團口至五里 朱川至五里 虎嶺頭入休寧縣境 七里至儒村里

至高橋至一里 王村頭至五里 雙嶺脚至二里 雙嶺頭入歙縣境 上岡村至一里 岡村至五里

小嶺下至五里 寨西橋至五里 湯口

婺源縣由東鄉至黃山湯口計三百零五里

婺源縣至十里 十里鋪至十里 鶴溪至十里 古箭至十里 古坑至十里 汪口至十里 湖山至十里 江灣

二十里 龍崗至十里 米坦至十里 官亭門至十里 塔坑塔嶺境入休寧縣至十里 水碓灣新嶺至新嶺脚

至十里 山斗里至五城至五里 龍灣至七里 霞阜至八里 雁塘至十里 高規至五里 屯溪鎮至六里

東關至七里 梅嶺入歙縣境至十五里 長齡橋至七里 溪南至五里 潛口至五里 佛子嶺至五里 楊千二

至 黃山谷口至三里 容溪至五里 上舍至三里 牛頭口至四里 長潭至三里 下舍至十里 山口村

至五里 石肩灣至五里 楊村至五里 胡村境至五里 金竹坑至五里 東坑口至五里 芳村至五里 寨

西橋至五里 湯口

婺源縣由北鄉至黃山湯口計三百十七里

婺源縣至十里 武口至十里 烏坑至十里 前坦至十里 金竹至十里 沽坊至十里 清華至十里 花園至

至 沱口至十里 山坑至十里 十保至五里 楓樹灣至五里 浙嶺脚至七里 浙嶺頭至八里 莊前五

至 梓塢里至五里 板橋石嶺至十里 倪源至十里 花橋至八里 界首入休寧縣境至十二里 上溪口至五里

西亭至十里 東充店里至十五里 涓橋至十里 藍渡至十里 巖脚至五里 洞庭至五里 珊坑至五里 小溪

至十里 藍田至五里 裏子坑里至十五里 儒村至五里 高橋至一里 王村頭至五里 雙嶺脚至二里 雙嶺

頭入歙縣境八里至上岡村至一里岡村至五里小嶺脚至五里寨西橋至五里湯口

績溪縣至黃山湯口計一百七十里

績溪縣至十里雄路至十里臨溪至五里界牌嶺入歙縣境五里至新管至十里排頭至十里吳山鋪里十

至歙縣城至十里鄭村里十三唐模至七里潛口至五里佛子嶺至五里楊干至二里黃山谷口

至三里容溪至五里上舍至三里牛頭口至四里長潭至三里下舍至十里山口村至五里石肩灣

至五里楊村至五里胡村境至五里金竹坑至五里東坑口至五里芳村至五里寨西橋至五里湯

口

休寧齊雲山至黃山湯口計九十四里

齊雲山至十里巖脚至五里洞庭里十五小溪至十里黟縣八都至五里朱川至五里虎嶺頭至七里

儒村至五里高橋至一里王村頭至五里雙嶺脚至二里雙嶺頭至八里上岡村至一里岡村里五

至小嶺下至五里寨西橋至五里湯口

太平縣由南鄉至黃山苦竹溪及湯口計七十里

太平縣至十里三口至五里樂意亭至五里普濟茶亭至二里迄溪橋至三里長源里至十里黃榜

嶺至二里 感梓里至三里 譚家橋至三里 桃嶺汪家至四里 排亭至三里 黃絲境入飲懸境五里至 烏

泥關至五里 上張至五里 苦竹溪溪村之西旁有石牌坊一座為高制台所建東入黃山之門戶也五里至 湯口

太平縣由西南鄉至黃山輔村計二十里

太平縣至五里 五里塔至二里 柏樾山至二里 黃昏洞至二里 饒村至五里 溝村至四里 輔村

太平縣甘棠至黃山輔村計二十里

甘棠至五里 張家埂至五里 耿家橋至十里 輔村關帝殿

太平縣甘棠至黃山栗溪坦計三十八里

甘棠至十里 興村至八里 白沙嶺至五里 章村至五里 焦村至三里 陳家至二里 攔路坊溪坦行過橋

往翠微寺五里至 栗溪坦

太平縣郭村至黃山栗溪坦計三十八里

郭村至五里 賢川至五里 綬村至三里 打鼓嶺至五里 九里坑至十里 雙溪鎮至三里 陳家至二里 攔

路坊直行至栗溪坦過橋 栗溪坦

旌德縣至黃山苦竹溪及湯口計一百四十三里

旌德縣至五里 信橋頭至五里 跳仙橋里二十 十五都至十里 東古內里二十 管家橋至三里 深村

至七里 廟首至八里 栢橋至十里 下洋至十里 下洪溪半二里 雀嶺頭入二里 留杯宕里五

至西潭 譚家橋至三里 桃嶺汪家至四里 排亭至三里 黃絲境入五里 烏泥關里五

至上張 苦竹溪至五里 湯口

旌德縣廟首躡東西箬嶺至黃山湯口計一百十六里

廟首至八里 板橋至七里 白地至十里 高家亭里十五 東箬嶺天線洞入十五里 西箬嶺頭汪

公廟平三里 樂得坐至七里 八里岡至三里 騎龍庵至八里 箬嶺脚至五里 文埜街至五里

譚家橋至三里 桃嶺汪家至四里 排亭至三里 黃絲境入五里 烏泥關至五里 上張至五里

苦竹溪至五里 湯口

涇縣至黃山苦竹溪及湯口計一百八十四里

涇縣至七里 七里圖至七里 晏公堂里十五 烏溪嶺至十里 榔溪河至五里 馬渡橋至十里 浙溪橋

里至十五 三溪鎮入二十五里 深村至七里 廟首至八里 板橋至十里 下洋至十里 下洪溪里二

至雀嶺頭 留杯宕至五里 西潭至五里 譚家橋至三里 桃嶺汪家至四里 排亭

三里黃絲境入歙縣境 烏泥關至五里 上張至五里 苦竹溪至五里 湯口

宣城南陵寧國三縣至黃山須踰涇旌太三縣因涇旌太三縣路程俱列於前故未重贅

石埭縣由烏石隴至黃山栗溪坦計七十里

石埭縣至十里 回驢嶺至五里 夏村至五里 烏石隴至五里 嶺下楊家至十里 娘嶺頭境入太平縣

湯家莊至十里 章村至五里 焦村至三里 陳家至二里 攔路坊直行至梁溪坦過橋 栗溪坦

石埭縣由穰溪河至黃山輔村計六十八里

石埭縣至三里 臨灘頭即舒溪河西岸大河眷夏有渡 穰溪河至七里 迪仁橋至八里 浮邱

坦至五里 黃葉嶺至五里 湖深潭至五里 芙蓉坑至三里 三折嶺至七里 甘棠至五里 張家埂至五里

至 耿家橋至十里 輔村

陽青 九華山至黃山梁溪坦村計一百五十里

九華山地藏塔至三里 洗手亭至一里 大嶺頭至一里 平田岡至五里 三天門至三里 轉身洞至五里

至 分水嶺至五里 二天門至十里 一天門至十里 南陽灣至二十里 陵陽鎮至十里 崇覺寺至五里

琉璃嶺入石埭縣境南下嶺至石橋頭至六松居五里李家梁五里回驢嶺五里夏

村五里烏石隴五里嶺下楊家十里娘嶺頭十里湯家莊十里章村五里焦村三里

至陳家二里攔路坊直行至栗溪坦過橋栗溪坦

琉璃嶺入下嶺越石橋由北蔭涼橋五里臨灘頭平舒縣五里入大穰溪河至七里迪仁

橋八里浮邱坦五里黃葉嶺五里湖深潭五里芙蓉坑三里三折嶺七里甘棠五里

里張家埂五里耿家橋十里

輔村關帝殿

和悅洲至黃山梁溪坦村計一百九十里

和悅洲過江至大通十里缸鉢埭十里銅埠境入青陽縣十里至橫橋十里青陽縣十五里栢家

橋十里朱柏店七里興隆里八里將軍廟十里分水嶺十里陵陽鎮十里崇覺寺

至五里琉璃嶺入石埭縣境此與由琉璃嶺踰西南入黃山至栗溪坦計七十五

里由琉璃嶺踰北入黃山至輔村亦七十五里

太平縣至黃山夫子山脚義姓亭計二十四里

太平縣至五里 麻村至五里 高嶺至五里 巷里汪家橋頭至三里 楊田嶺至二里 錫溪程家至三里

夫子山脚灰窰至一里 義姓亭

山內路程

縣歙 湯口至獅子峯計四十里

湯口至四里 逍遙亭至四里 紫雲庵至二里 慈光寺至二里 鶯谷石至一里 飛來洞至一里 欄杆石

至二里 度生橋至二里 半山寺至二里 橫雲至二里 雲巢洞至一里 蒲團石至一里 一線天至一里

文殊院至五里 蓮花嶺至二里 壁刻上蓮花峯四字處計至此分途右登足窠上三里至 鰲

魚洞至一里 平天硯至五里 獅子峯

縣歙 苦竹溪至獅子峯計三十里

苦竹溪至三里 天紳亭至七里 雲谷寺至四里 白沙硯至五里 玉屏河至八里 白鵝嶺至三里 獅子

峯

太平 輔村至獅子峯計三十里

輔村至三里 松谷脚庵至四里 芙蓉嶺至三里 松谷庵至五里 下劉門亭至五里 中劉門亭至五里

上劉門亭至五里 獅子峯

平太栗溪坦至紫雲庵計三十里

栗溪坦至五里 伏牛嶺頭至五里 吊橋庵半二里 海雲亭半二里 新庵亭半三里 碧雲亭半一里 湯

嶺關至五里 橫坑庵亭至二里 鳴絃泉至一里 繁淺盃至一里 虎頭巖至一里 慈光寺山門行直

至紫雲庵北行上 慈光寺半里許 至紫雲庵

平大焦村陳家至翠微寺計八里

陳家至二里 攔路坊至三里 麻衣塔至二里 方來亭至二里 翠微寺

平大錫溪程家至神仙洞計十五里

錫溪程家至三里 夫子山脚灰窰至一里 義姓亭至五里 麟趾橋至一里 福固寺至五里 神仙洞

平太松谷脚庵至洋湖里計五里

松谷脚庵至一里 引針峯脚至四里 洋湖庵由西南計可達洋湖紅約

入山沿路風景

寨西橋至湯口五里

寨西橋在歙縣西鄉距城百零五里橋曰雙溪寨西其地名也橋之南通岡村東通芳村北往湯口西爲浮溪溪水由此而下芳村浮溪之上爲陰灣大宕宕東爲雲門峯宕西爲浮丘峯雲門峯與此橋相向遊客自山口嶺而上迎面一峯出自霄漢若天闕雙峙雲行其中者卽此峯也峯爲黃山閒關距寨西橋二十里秀削而絢麗足以感動遊興昔黃山源與太平焦村交通率由此溪而上越浮溪岡下灰礧山踰雙河口而至栗溪坦今浮溪道中雖荆棘滿布而石路猶存不知從何時改走湯嶺下橋北向幽徑縈迴山形聳秀繞黃山司舊址一里過汪公廟二里至扁擔亭亭常施茶以濟行人又一里抵查木嶺嶺無峻級每游人至此不疑其爲嶺也嶺頭爲南幹正脈過此而出俗傳明洪武初間太后患背癰醫者束手令有司蹈山尋脈至此見有新建之土地廟毀之癰卽愈然耶否耶姑妄聽之下嶺則巒石晶瑩林木青碧一里至湯口攔村一河水繞前山而出河水自黃山逍遙溪而下故湯口有河東河西

之稱越橋而北爲芹菜嶺一名金絲嶺嶺北爲苦竹溪距此五里由太平譚家橋入黃山之南部者率由此嶺至湯口合徑游客至此即可隨河而上毋庸問津矣

湯口至紫雲庵八里

湯口者乃湯泉溪口在歙之北鄉也居民程姓距城百一十里緣溪而上東有銅錢山猴子口自然山西有倒破外山坑桐樹壩皆入山夾道之名稱也遙眺攢峯駢列橫出天表中高者爲紫石下如筆架者爲聖泉南連矮而團立者爲清潭紆迴盤曲四里至逍遙亭下有扁擔石香爐石前山有和尙塚河爲逍遙溪一名錦魚溪石液盈盈時見文鱗游泳水激石作聲砰砰然如在巖灘富瀨溪中有白砂棺材鍋底孩兒諸潭均以形似得名尙堪悅目一路參天木葉匝地籐陰水色山光襲人衿袂上行半里越鎖溪橋東山水瀑如布白練長垂卽布水源也上爲清潭峯下爲百丈潭飛湍瀆雪濺沫成輪源水鳴滲於此再里許迎面上山有大坳者卽湯嶺關也距此可十二里關下桃花峯旁有石偃僂如負人狀山僧呼爲張公背張婆再二里至巉巖峭立陡峻四山蟠束下爲小補橋卽古之臥龍橋也橋之北則湯池在焉昔有

二窪今僅存其一泉出石根瑟瑟如燔湯又有冷泉一縷出壁間以適均其溫涼之度橋之南則祥符寺存焉寺湮於水後人雖重構數椽然無僧居之已門可羅雀矣橋後溪中有石如椅乃鄭公釣臺也溪水繞桃花峯而下謂之桃花溪橋下合湯泉出水故名湯泉溪拾級而上石刻游如斯始四字古木修篁中巍然高峙者則紫雲庵焉開窗眺望面山臨澗雜樹千章團陰結翠俯矚青龍潭清深可酌黛蓄膏渟古人所謂桃源者即由此而探也

紫雲庵至慈光寺二里

紫雲庵古一茅蓬也今則棟宇巍然竹苞松茂矣山門仍顏黃山一茅蓬五字示不忘本也門外修竹千竿高出簷際木蓮兩本左右挺立花時芳氣襲人吳太史廷簡謂爲希世之寶非過譽也庵上爲紫雲峯後爲紫雲巖有程部郎振甲書三字鐫之巖上西行百數武庵後北山石壁巖辭欹挺巖腹高可百丈左右清流淙淙走壁而下俗稱人字瀑布即指此也中鑿石級曰羅漢級方黃山山徑未開歛游者多取道於此昔日之山徑危險可想而知度回龍橋其水自天都經此而入桃花溪白石磷

磷橫亘水底衝湍搖盪若龍起伏能出雲氣作雷雨懸巖劍龍潭二大字鄭徵君師
山篆也越橋而升路爲黃海山人所修山人乃汪太守宗沂之隱號也前爲慈光寺
山門舊址卽古之關帝殿也前山爲桃花峯昔日武陵已如去年人面峯下分裏中
外三蓬各蓬皆有古刹如湯寺如桃源如蓮花如淨林如青蓮星羅棋布亦足以點
綴溪山粵亂遭燹成墟今則滿山荆棘矣峯脰有石橫嵌一竇黝然水從石滲出縷
縷如垂旒卽水簾洞也洞右有軒轅碑洞上有丁公庵雖庵傾碑裂猶有古蹟存焉
前溪深處曰白龍潭洶湧激衝令人目眩心掉旁有墨浪庵故址對岸有丹井丹井
之上爲洗藥溪水盈盈不竭相傳黃帝煉丹汲水於此溪中有迴瀾石三字江中丞
東之題又藏舟石形如小艇潛泊深港呼龍石在白龍潭側左壁劍呼龍二巨字昔
吳太史廷簡游此見有物似魚長而有角殆真有神物居之歟入山門里許曰聽濤
卽古之得心亭也高踞坡頭硃砂泉由亭右瀾瀾而下亭旁道路爲許觀察球所修
石壁上鐫其館名緣磴盤折繞路燈而上數武旋向桃花峯下艸木叢中南窺洗藥
溪溪中圓如井口水帶碧色前所稱丹井者卽此處也再上一曲一里許過二天門

至天王殿入門則局勢開宕寺基宏闊昔日之壯麗喬皇猶可想見硃砂峯聳於前聖泉峯環於左紫石峯峙於右如廟堂朝會公孤羣辟冠裳畢集焉蓋一路爲密林修篁掩翳游目至此豁然廠朗眼界一開矣

慈光寺至文殊院十五里

慈光寺古曰硃砂庵以正當硃砂峯下也明萬曆勅建改今名廣廈萬間多燬於咸豐兵燹今漸開拓建築足駐游踪寺左有普同塔千人鍋可想見當年僧侶之衆焉寺後有硃砂洞硃砂巖皆以硃砂名者以其地富於禾養也鉢孟峯斜插於東法眼泉橫瀦於西蝦蟆峯踞紫石紫雲兩峯之間栩栩生動有欲躍上天都之態由東谷踰金砂嶺而下鶯谷石過碰頭石而穿飛來洞前去沿壁而上曩者足窠曲折殊難着趾今則陳居士兆軒慨捐千金鑿壁鎚巖闢成夷徑昔日之徑斷架木溝深砭石者近日築爲石板大道緣中溝西岸拾級而上越打鼓洞前由洞下架木盤折而上今履洞上直行而去並造鐵欄以便游人撫手險夷不啻霄壤三里至度生橋跨澗入老人峯東隴老木撐徑壽籐冒石陰沉窅窳非復人世二里至半山土地平地數

弓有石可憩近僧明光建寺於此宏廠幽雅足以棲息游客東望山岡有石如雞獨立翼鼓頸伸俗呼金雞叫門簾危嶢絕巘愈上愈佳西望硃砂峯後岡有石如人古稱老人峯卽此處也石旁一矮石對峙又稱羅漢對觀音下有觀音崖相傳爲大士化身處殆齊東語也北爲龍蟠坡庵址再行百餘武回顧金雞向移形易宛如五老矣肩摩踵接面向天都曰五老上天都前有石人偃僕扶筇若爲導者亦稱老人峯也二里踰龍蟠石上三觀嶺則世界劃然豁開別有天地千奇百怪雜然並陳峽對蓮花石骨秀削路旁有石橫臥孫太史晉劔橫雲二字於上龍蟠石一名打鼓墩又名龍蟠坡前向蓮蕊峯下坳處曰姊妹放羊形像尤肖千巒競峙萬壑含深凹然凸然盡出尋常意表古松破石而生穿罅穴縫或叢出或孤立或偃或仰或臥或起直豎橫撐蒼翠欲滴覺從前丸丸謾謾僅供墨突之黔耳上行數百步爲天門坎天門坎者兩壁夾立僅容身過昔普門稱爲三觀嶺者卽指此也嶺路險峻砂石充塞游人經此頗爲艱澀後得汪居士蟾清暨好善者慷慨解囊以繼陳君而築此段道路計十五里昔皆危磴今成坦途兜轎往來尙無阻險此皆慈光寺脫塵募化所致嶺

下有趙州庵故址月脅一崖逼於左龜魚一石聳於前天門坎下有兔兒望月文殊台側有老虎下山蓮花峯畔有姜太公釣魚旁有石人或謂之伍吉問卜亦未始比擬不倫也二里至石穴呀然曰雲巢洞釋稱真如關洞名乃曹太史鉛所鑿今開新路繞洞左而上至此東瞻觀音石慈容儼然當握處昔有小松宛如執楊枝而灑甘露者故又名觀音灑淨下有矮石狀如童子又名童子拜觀音再上經別有天天都照映雲煙萬狀黃太史魯峯劍觀止二字宜矣盤折而升則小心坡至矣左絕澗右峻壁路僅容足側身始過咸稱最險之處後人鑿級護以石欄許太守寧曰可改名放心坡不吾欺也石欄上端有石嶄然特峙形如滿月可跌坐十餘人曰蒲團石過此從巨石劈裂中行爲臥龍洞昔有古松橫生洞上若龍之偃臥也曲折而上左右石壁屹立如堵一盤一曲上繞山脊若關隘然轉則爲仙人橋有石磴可憩仰視天都猶在霄漢俯矚深壑邃谷如臨九淵羣峯矯矯旁無所依下無所藉渣滓淘盡祇存勁骨青天削出芙蓉惟此足以當之澗下丹泉氣息芳冽水下隴溝旁有普賢洞佛掌巖石白石杵如棋布然越橋則又兩山界立中開仄徑徑疊石級級高且狹愈

高愈險愈險愈奇所謂一線天是也鸚哥石蹲於上飛魚石出其旁昂首欲鳴鼓鬣欲躍矗立排空宛然生動從裂石中拾級疊升經蓬萊之島入轉身洞俗稱羅漢洞又名文殊洞深黑且溼疑若路斷途窮鑿空梯而上井口如陽神之出泥丸絕處逢生雲巢洞至此三里文殊院將至矣洞口一松若擁篲迎門者曰迎送松回顧東南凌霄入雲者天都峯也而仙人出轎老鼠探壘以次畢呈焉天都爲黃山絕頂直與天際古人謂呼吸可通帝座誠非虛語九垓芒乎一家滄海渺乎一勺一切岡陵直可螻封視之西行數武有淺岩古松相對古松志稱迎客松黟兩士人游此題字石上曰仲岩曰老松蓋兩人之別號適與此景巧合也又有小清涼三字以其宛似五台也過此卽文殊院院踞萬山之巔地平如掌玉屏峯擁其後硃砂峯拜其前天都聳於左蓮花峙於右秀麗崇巍各呈其妙耕雲峯頂有石如鼠伸首弭耳作勢奔上天都曰松鼠跳天都蓮蕊峰含苞未舒奇峭不可登旁有雞形背蕊面花曰金雞探玉蓮又有石如船桅檣畢具曰探蓮船一曰渡雲船又名洪船出海紫石聖泉諸峯如列戟遙衛桃花老人諸峯如衆星朝拱千巒萬巘崢嶸嶙峋羣秀競爽波委鱗屬

曠然別一世界古人云不到文殊院不見黃山面洵不誣也尤奇者獅象二石蹲拱院門左右當前陡起石台名文殊台方廣不盈五尺登足窠而上前眺如萬頭巒岬皆出足底相傳文殊跏趺成道處然歟否歟固不必刻舟以求也

文殊院至光明頂大悲院十里

黃山峰巒競秀幻雲成海勝蹟奇觀不可縷數惟文殊院踞萬山之巔極目千里後倚玉屏矗立障護上刻天地自明此山尊奇松怪石等字獅巖旁有程部郎振甲題大巧若拙蓋皆欲藉此留名不足以言風景也前望鳳凰石鳳凰鳴矣于彼高岡軒轅之世或見來儀之瑞耶西行數十武爲立雪台台旁有石如鶴登台北望石筍峰南瞻白嶽山皆楚楚眉睫間徐元仗之豈有此理天童老人之到者方知足爲黃山匾額下而復上登陡峭之壁下臨絕深之壑壁鑿足跡依跡着足古稱閻王壁是也近爲休寧韓知事燾偕何繼昌崔吟濤諸居士籌款平治化險成夷下轉身巖出大士巖徑皆險澀觸額鬻膝級不如趾經蒲團松左右皆危巘下爲蓮花溝怪石磊落清流凝碧奇艱相軋匪夷所思西北略上爲蓮花洞上爲搯月崖聳峙凌空有樹如

蓋林中多山樂鳥其聲嚶噎如奏絲竹山中時見飛鳴想多巢集於此也溝之北產天花石又名放光石碎之入火影霞星射熏衣衣之可治痘疹路上有二庵舊址一名喝石居一名蓮花峰茶庵睹此荒基不無滄桑之感側爲牛鼻峰上爲蓮花嶺仰而升者如履危梯踞嶺東望天都遠矚峰巔有若屋宇者有若門第者有若人立者曰仙人把門又曰丞相觀棊五里度嶺入石罅中行有稱犬一綫天出罅百數步則危磴仄砌攀躋而上壁刻上蓮花峰四字至此分途右登足窠上三里許則達蓮花峰巔雄秀無倫其高與天都相伯仲惟砂礫滿途滑難立足武窮則洞窮則級級窮則又洞或如危橋而右欄天成或如重樓而虛窗四闢展轉玲瓏螺旋蚓曲昔有僧誅茅嵌石岫中今則久飄風雨矣凡經四洞皆銳木豐腹古人稱藕節中行緣本入瓣良然峰頂有香砂井形如罐深尺許砂噴之氣若松脂又有圓月池以形似得名下爲天然池水常不涸澆之可愈日昔昔安公疏之而成題曰勝水宋人吳孝廉龍翰夜宿於是所謂霜月洗空一碧萬里者卽指此也此峯巍然中立環視萬峯面面皆蓮此爲蓮母東顧天都獨不相下儼齊楚雄頑兩大並尊各執牛耳其他諸峯

江黃滕薛崩角拜稽周家王會夏氏塗山莫此過矣悲頂排空矚乎其北蓮蕊硃砂之屬拜下塵矣蜿蜒下由石人旁下百步雲梯梯約二百餘級曰百步者舉成數也遙望西岡若人跌坐曰老僧看海羊腸鳥道盤曲崎嶇達鰲魚洞離洞數十武回顧蓮花峯下有上下兩石如冠臨朝俗呼容成朝軒轅面目縷析洞乃高巖峻壁中開一三角竇宛如鑿成豈五丁力士故顯此神通欲使遊人咄咄耶穿洞口而上若久祕帳中揭之而出前望北峯爲煉丹峯西折登岡則天空地闊一望無涯所稱天海者是也海中諸嶼錯列如虎踞如龍盤如芙蓉菡萏之初開如玉女倩妝如百戰場中戈旗簇擁種種奇幻足令畫工擱筆鰲魚洞後脈趨接容成峯峯下有洞竇篆丹書蝌蚪鳥跡莫敢捫讀前履天海俯囑西山外濃綠平畦溝渠交錯則太平之絃歌鄉也五里至大悲院北上天砭砭長百二十丈豐廣三丈平橫如甃砭之東阜爲光明頂獨秀霞表高懸天半不但夥之方嶺可以俯觀卽吳越山川亦遙遙在望砭之西阜爲石柱峯峯之南爲水晶井峭壁一井圓如滿月自口至底如琉璃宮深有四五丈之奇亦巨靈五丁之所幻也砭之南庵爲大悲院砭之北庵爲隱泉茅蓬皆

初建之梵刹將來告竣亦堪爲游人息足也。碕之南爲前海，碕之北爲後海，其西則曰西海。時而白雲墳起，乍伏乍昂，若斷若續。時而黑雲數片，依遠盪漾，若島岬在銀海中，與波上下，遠近松濤，彷彿潮聲澎湃。古人所謂雲鋪海游者，則可遇而不可求矣。

光明頂大悲院至獅子峯五里

大悲院在光明頂平天碕之山腋，初爲普門和尚所建，因供奉明萬曆皇太子所賜大悲觀音像，故名。今僧慧林募款重新，尙未告竣。繞院左百餘步，卽上光明頂。光明頂爲黃山之中天，都蓮花之亞，睇長江如白練，九華直一螺髻耳。松檜巖壑亦疎亦密，亦幽亦奇。平天碕有鳳凰枰，棋諸松均以形稱，各呈其妙。光明頂之北爲石門峯，棋石峯，又爲獅子林，前之貢陽山也。林背橫亙獅子峯，面貢陽山，爲黃山北門鎖鑰。西海之外最高者爲雲外南連者爲石床石床之旁有觀音打坐下有觀音崖，雲外與西海口之間一峯南聳者爲松林，下爲石榴崖，碧綠蒼翠不可舉。似碕之北出者左有仙桃，右有薄刀，兩峯遙峙，不啻鼓旗高懸。由仙桃北麓可達西海口，口北圓矮

者爲石鼓峯透迤者爲丹霞峯下光明頂數武至石門峯南角橫有阿彌陀佛四字傳爲菩薩所書時現時隱可遇而不可卽也由此回顧光明頂之東有石如鼈伏曰團魚臍子宛有生動之致緣石門西麓而行昔皆犖确今成坦途乃蘇州金君松岑募勸力也前後左右靈怪環擁如入五都之市目眩色飛至貢陽山下經松林中古木蕭森綠陰如畫化險爲夷頗良於行而獅子林在望焉繞灣北眺始信峯坳中有尖石挺出如筍曰石筍峯歛地凌霄一空倚傍宛似鬼斧神工有心鑿琢者吳太史廷簡有云向者一步一叫絕至此一步十叫絕矣

獅子林上清涼頂旋至始信峯三里

獅子林在獅子峯南脚旁有屋數椽曰獅林精舍太平崔公使國因所修也清幽淨雅可以棲遲左有麒麟松後有鳳凰柏世所謂祥麟威鳳者想不過爾爾天眼泉在林後望仙台在峯上四顧皆石壁惟林前有土質奇松羅列有高僅數尺而蔽地畝許者有枝幹上下拗折而頂平如掌者奮鬣裂鱗於斯獨擅龍攫鸞翔殆不足喻古人云不到獅子峯黃山不見踪信然西望丹霞峯諸坳中曰達摩渡江曰團魚晒陽

曰仙人指路曰老僧採藥櫛比棋布目爲眩眴倚門窺望西南松隙外石鼓峯上有石如龜伸頸就吸曰靈龜探海下爲錦霞洞將隱崖由林上清涼頂路側有僧人葬母塔繞塔而上至寺旁石上有程中書芝雲所鐫面面受奇四字又汪明府勳鐫神巧二字可見造物之奇巧使人無能名焉至清涼頂有新建蘭若名正頂清涼寺供佛於樓石室繙經莊嚴清淨卽古之臥雲樓也箕踞絕頂目空一世登樓四眺不啻身入畫圖東有始信峯西有丹霞峯對面有貢陽山翠擁螺環宛然屏幃貢陽山頂左下坳爲白鵝嶺嶺東凸立者爲白鵝峯俗呼板壁峯山頂右上爲棋右峯石門峯然石門落坳視線尙未能及再上圓爲覆鉢者爲光明頂頂踞一山之中諸峯如列侍衛右提左挈全收眼底西出者爲平天砭砭下有石似桃而長形如合十四無依託拱立石端曰合掌峯又稱飛來石再下若峽者爲西海口觸石出雲瀾漫上下洋洋巨壑直可乘槎下爲石鼓峯俱在後海區內島嶼遠盪諸巒布列高峙環抱穿插成行隱現參差千變萬態樓西下有鐵線潭落崖千丈深藏不見禱雨者探潭取水每有神驗豈其中真有靈物歟樓東左出遙見始信峯左岫有五星石又稱天官賜

福形狀畢肖前行數百武北折有石刻特奇二字署名厚庵者數武度仙人橋上清涼台志稱法台長可八尺廣半之台側有松破石而出枝葉已枯尙能扶手傳總長增湘題詩於上山之北境晴空寥廓一覽無遺惟東有石筍林立峻空突起拔地插天坼裂鈎連玲瓏空靚林林兀兀有若龍孫者各發其趣下台旋獅林精舍左屋角轉東行數百步昂首者黑虎松也交柯者連理松也有石挺生東隴平空聳立下圓上銳其狀如筆松貫頂生覆垂而繞之則夢筆生花也筆峯南側路上近建中五台庵鳩工庀材經營伊始一峯高與筆齊五石錯出狀如筆架何天造地設如此之巧合耶前有溝遇雨病涉今已造橋爲王居士森甫所建居士法號慧明李法周卽以其名名其橋庶不忘其本也行里許有岔路右上者達丞相源左出者往始信峯途次新建蘭若爲九華心堅退居之所行雜樹叢中碎玉琅璫濃陰覆地又一里則絕壑危巖下臨無地直似巨靈掌劈者中駕一石橫於兩崖狀若飛虹曰度仙橋又名仙人橋有松根長北嶙幹依南嶠橫迤如欄曰接引松黃儀部汝亨所詫豈有此理卽指此也旣度橋迎面石刻署祁西汪啓邦造過此則俯首側背從石罅中行蹈枯

松根經石欄杆前去數百步入始信峯疊巘礁嶢深迴窈窕壁刻有諸天變相四字江寧韓太史廷秀所題略上刻有原來如此四字頗類禪語不辨何人手筆又有聚音松三字蓋旁有古松相傳能聚江麗田琴音故名入石門攀躋而上爲始信峯頂登頂俯視光怪陸離莫可殫述峯巒奇妙見者始信故黃太史習遠錫以此名蓋亦無能名而名之耳故厚庵又題無能名三字崔國因七律二章傅增湘五言一絕均嵌於此旁有孤松鱗鬣森森作吸海勢曰擾龍松松後有石如椅下刻麗田生彈琴處五字石前有小橫碑爲江麗田自記今已毀沒矣前有數松環繞幽秀絕倫志稱定空室卽此處也昔獅子林開山僧一乘每晚宿此風雨無間江節愍書寒江子獨坐五字於扉雖室圯蹟湮今尙傳爲佳話知高僧逸士自有真也峯之東爲上昇爲石筍又東爲仙人爲軒轅北爲望仙南爲白鶴矯矯摩天爭妍競秀未可以言語形容也白鶴之下有仙人對弈東有五老盪船西有猴子過山離奇詭異於斯兼美名之始信難與未到者道也

苦竹溪至丞相源雲谷寺十里

苦竹溪在歙之北鄉本名古蹟西溪土音訛爲今名居民舒胡程謝諸姓與湯口共一區入丞相源第一重門也南距湯口北距三汊皆五里溪中有雲谷寺之脚庵名繼竺庵近爲僧宗教所修堪以小住旁有四柱石坊上刻黃山勝境四字乃乾隆三十二年兩江總督高晉所建過坊曲折而上向砂碛亂石中行夾道松柏青蔥竹木交蔭二里至茅草亭地號新羅源口有新羅庵故址旁有石井水深莫測一里至六角亭又曰天紳亭仰望山陰石窟如連珠纍纍則九龍瀑布也跳珠濺玉聲若雷霆呀呷撞胸如杵在白瀑落爲潭潭流爲澗澗注又爲瀑如是者凡九故名復上經開門石度珍珠嶺敗葉壅途苔封蘚滑二里許有香亭拾級而升右石上有老憫刻榜仙飛去遺下青鸞八字更上爲汪明府松岩所刻上曰仙人榜下曰來者有緣岩石撐住蒙籠罍屨如無人徑拂榛而上則香爐峯聳其左眉毛峯列於上鉢盂獻其頭天都露其背而丞相源在望矣清溪小阜盤折澗洄又里許道左有徑可達龍鳳庵故址昔爲黃山卓著禪林今則銅駝荆棘矣右有釣月台梅屋讀書處外字蘚苔剝蝕全豹莫窺殊令人不盡滄桑之感左有麗田墓草封木拱久埋荒蔓之中早不爲

游者所注意況須繞道始得而至焉向直前行右刻漸入佳境左刻醉吟又有徐明府士業刻通幽二字雖蘚痕斑剝而筆致均適逸可喜從可知入室者由此升堂焉將近山門先有正志禪師塔正志號檠庵卽熊光祿開元入釋之名也右有岔路沿溪而入一水澄清鑑人毫髮修篁異卉夾岸雜陳溪中有石凸起形如獅又有石圓如球名獅子望球上刻已移我情四字乃程部郎振甲所書下劔五松入韻署款湖不知何人手筆獅後有大石如四几相拼相傳江麗田常攜琴於此鼓之石下有江麗田琴台五字係嘉慶乙丑所鐫也里許入寺則前後異蘿松兩株同幹異葉乃翠柏與松楊合體施於高枝並不著土嫩綠深藍濃陰滿院蓋數千年物也院名擲鉢後改雲谷寺重建未成其荒涼可想見矣左山名羅漢峯峯之北隴爲丞相東源介於羅漢仙都兩峯之間源產彩石紫瓊黃琮得者珍如拱璧今則游踪寥落無復有知者矣

丞相源雲谷寺至獅子峯二十里

丞相源乃宋右丞相程元鳳讀書於此因以得名也雲谷寺卽古之擲鉢禪院院踞

白砂砭下左爲羅漢峯右爲鉢盂峯旁有錫杖泉又名靈錫泉相傳東國神僧卓錫時有泉湧出至今不涸道旁松下有石人曰仙人戴傘又有數石攢聚若團坐酬錯者曰仙人會飲由寺後隨砭隴而上烏道盤曲蒼莽密翳里許石刻藏雲翳雨乃江蘇韓太史廷秀所題涉澗登山蛇盤蝟曲頗不利於行昔爲歙北喻安山所修今仍亂石充塞矣四里至白砂砭折而南望天都與鉢盂之間挺出一峯上有一鳥如飛來者卽青鸞峯也北有仙僧洞在仙都峯下正對鉢盂峯由雲谷寺左有徑可通方外人居洞中而成道者代不乏人洞有燈朗朗如星月曰聖燈故又名仙燈洞歲時一現間有見之者亦奇矣哉穿林踰峽上復下下復上者林深箐密蘚綠苔蒼惟河石狼藉殊難着趾五里至白沙嶺嶺旁有塔俗呼黃帝墳實高僧雪莊之塔塔後一亭名招隱亭爲李法周所修北有別峯菴故址西有看雲台古蹟皆可悅目更上則奇縱橫若龜若鶴若鳥若蛇若盂若鐘若床若几日眩神飛莫能名狀倘使米顛到此定當長跽百拜矣從此上行路陡且逼袁觀瀾提倡修築經營伊始愈上愈艱愈艱愈妙閭浮提人如登天界也經青蛙峯至石門峯東麓泉有澡瓶洞有狼豹石有

雙龜崖有猿猴鬼斧神工出人意料奇獻巧應接不暇又有淨瓶石其形更肖在觀雲台上回顧佛掌峰則在天都之左與板壁峯對峙若在白鵝嶺右橫望則見有張公帶兒介子背母諸名稱古人謂黃山景物易向則形異移步則狀殊未可以膠柱求之豈不信哉越白鵝嶺又名板壁嶺叢竹覆徑冒人襟袂下嶺里許路分三岔左達獅子峯右入始信峯愈趨愈下狀若建瓴形勢爲之一變氣象亦爲之一新游者至此不啻天際游龍降潛深澤矣

巷里汪家橋頭至神仙洞二十里

巷里汪家橋頭太平之南鄉也昔爲汪氏今皆胡姓距城二十里出古月亭繞紅山過久欲亭而上三里至楊田嶺嶺頭有洞若石室焉曰楊田洞二里至錫溪程家跨河而上三里至夫子山脚灰窰邊左往羅村有大戰嶺跑馬岡黃帝坑諸名勝直行里許至南陽亭又名義姓亭亭東峯巔刺天高出雲表者爲夫子峯又稱夫子尖土人呼爲蠟燭峯蓋從形家者言也峯下有石洞高丈餘圓如半月廣約三丈可容百人光明軒敞頗可迴翔洞口東隅有一小洞高二丈餘寬僅尺許滴水丁東窅然以

深莫窺底奧或曰昔可達羅村今則泥淤沙塞無復當日桃源穿亭沿澗清泉一道白石錯出拾級而上修林蒼翳可五里疊石成梁曰麟趾橋橋西竹叢中有古刹額曰福固禪寺寺在軒轅峯下卽神仙洞之古庵近稱脚庵者以其在洞下也神仙洞又名仙人洞在澗東高巔由福固寺東行度重輿橋平石橋南折入壑路出谷中疊層上升碎石纍纍級仄磴高領膝相觸二里半至轉身洞石礪天開不容直入斜折而升形若旋螺捫壁數十級罅漏天光如醯雞之出甕焉愈上愈艱迎面一穴軒然曰仙道洞深約丈餘廣稱是依洞旋升回首北望高蓋者爲夫子峯峯之南部沙黃狀如人影俗呼肉身和尚峯之東下爲太白書院乃李供奉訪胡學士暉至此獲雙白鷗遂以名院上至洞頂有巘龐碩如羅漢腹外倚石壁上連下分裂縫尺餘曰挾身洞衣擦壁索索有聲洞中斜鑿石級最屢而躋蓋立洞側橫嵌石欄捫行數武卽神仙洞口也轉身洞至此約二里半額鐫簡默洞天四字山僧以洞內供奉大士故又呼爲觀音崖寬八尺深五丈前高六尺後高二丈中供大士三尊龕後有池水清而淺石液盈盈名爲流盃求子女者以手探池中摸石一枚長者兆男圓者兆女輒

有奇驗此理之不可解者右隅有小竇縫裂數寸常有風透出冬溫夏涼此又理之不可解者尤奇者神座右石壁上斜穿大竇圓如滿月光線透射不啻濯魄冰壺中設木梯捫石登足窠蟻行猿升丈餘達洞口竇外尙突石如階惟無有敢登者立身竇口遙望九華數點長江一綫均在西北落照間也

輔村至松谷庵十里

輔村在太平之西南距城二十里李任余穆諸姓若分茅焉出輔村越竟成橋沿溪而上山明水秀松濤竹籟雜奏並陳遠眺山巒坳處卽芙蓉嶺嶺南高聳者爲磨盤峯峯西若菡萏含苞怒起者爲芙蓉峯峯下突出頭角崢嶸者曰探頭峯峯下青山尖立者曰引針峯因峯頭有石能引針故名嶺東挺出者上爲猴子面下爲座盤石逕舒而平二里過二龍橋橋有二道一爲成化間所建一爲李法周所修又一里至脚庵乃松谷庵之下院也東有陰湖西有陽湖亦曰洋湖可半里至引針峯麓略上有小路往西南上山約四里可達洋湖庵直行半里路西有石洞俗呼半邊石屋廣約八尺尙堪容膝棲真者常居之又半里至芙蓉亭度芙蓉橋級高溼滑盤折而升

三里踰芙蓉嶺嶺額請觀二字乃康熙辛未陳邑侯九陞所題嶺在芙蓉峯麓峯上有馬蹄石如馬蹄之印泥中深者尺淺者二三寸相傳黃帝乘馬經此也嶺之右岡隨流直下勢若長虹謂之黃龍出海下爲汪波潭淵渟泓淨令人心魄俱清對面高峯蜿蜒空際作勢升騰曰飛龍峯下嶺東轉有茅屋數椽卽芙蓉庵也嶺上有洞嶺下有亭及橋皆襲芙蓉名蓋緣近芙蓉峯亦以便游人默識非真若凌波仙子旖旎玲瓏也下嶺過陳公橋越益壽橋依山麓而行二里道右壁崖橫疊有石如床瓦塞其間曰油榨水從石縫中飛落噴薄碎磅路下河水其源發自平天砭與石筍峯如銀河天上來深約二丈許作翡翠色曰油潭北塋有石如甕膏渟黛蓄曰油缸進行數百武溪水穿決轟號轟怒雷扑雪捲匯注爲潭鼓撞觸搏石竅關通曰烏龍潭又呼應夢龍潭有石岩覆之上刻烏龍將軍像並聯與記尙可辨認對岸山脚有石凹如鍋者三山水注射其聲潺潺曰炒子鍋穿松谷亭砭碎光漬莫可名狀一里越志成橋橋爲太平譚居士芝屏所築而松谷庵至矣庵前又有三潭一老龍云有黃龍潛居是曰珠淵一青龍云有青龍偃伏是曰澄碧一白龍云有白龍深藏是曰瓊玉

語涉荒唐大約各以其所映之壁色名之風嘯雷鳴天地掀簸昔吳太史廷簡謂人臨其上畫工擱筆方太史夜坐此謂無語可贊無色可似天下水石無復出其上者不其然歟

松谷庵至獅子峯二十里

松谷庵在疊障峯下張真人尹甫修道於此松谷乃其別號因以名庵河澗考槃自然幽雅庵旁有東古寺昔本十方叢林久燬於兵今又經營伊始矣邑志載松谷有鶯石松籟寂靜時如聞簧囀庵前爲枕頭峯仰天宕後有仙人晒寶上鐫風雨晦三字沿河而上宛轉陡級里許度緣成橋橋乃李法周募建穿溪躡巒又二里則爲松谷庵老基蓋張真人初居之地藥爐丹竈久已成墟惟修竹千竿古松幾樹而已進行則山高磴仄愈上愈奇有兩石對峙大者若合掌跣跌小者若鞠躬下拜曰童子拜觀音二里至下劉門亭前爲轎頂峯寶塔峯後有太白敬酒老虎駝羊寶塔之上又有觀音打坐宛然大士現身遙睇石筍峯石筍砢瑤蓼森秀亦楚楚眉睫間已再上則飛龍與疊障兩峯夾道由西度河復入西五里至中劉門亭亭前危崖峭壁間

有黃如直匾曰天榜又名天牌篆書數十策策勒勒非波非磔奇古不可辨認左畔有石若衣冠丈夫垂紳搢笏而立謂仙人觀榜狻猊不能緣也相傳羅太守汝芳架閣道觀覽僅辨一仙字忽迅雷擊其字去之緣壁旋轉壁半一穴中空類半窺炯如天星可透隔山天光與眼適相射俗呼天眼再上則兩山夾秀巉巖接天鳴中一峯迎面挺峙卽寶塔峯也浮屠矗立聳入雲霄較在下劉門亭觀時尤爲顯豁也繞峯而上級高且斜徑仄且滑沿途雖有仙人鋪路仙人補路諸景游者每以駐立維艱未能飽覽耳五里逾書箱峯藥箱廚而上劉門亭亭前有三尊大佛妙相莊嚴其有世尊說法衆生諦聽之態大佛之南有峯突起者爲仙人峯峯之南脰曰關公擋曹上則氣概雄威下則形狀狼狽均各神容畢肖峯東有十八羅漢朝南海肩摩踵接宛如聯袂偕行再上回顧書箱峯藥箱廚則箱屨備具狀若抽動穿林而上千峯鎖黛萬壑鳴愁道中松石莓苔蒼繡質理錯采欲流濃翠欲滴然路賒級峻艱若登天層折崎嶇肩踵相觸東有猴子拿桃波斯進寶西有美人照鏡天鵝孵蛋是殆吳剛之斧追琢而成故使人一見而知爲某某也再上路平如掌袤可十數弓爲小平

天缸缸上山旁有井曰龍眼深不可測未有敢探其底者沿河一谷前通始信峯麓志稱散花隴是也入隴宛如門戶諸峯環布若城郭奇松異石犬牙相錯如阿房在陰凝紺在日凝朱氣色晃耀奪人目睛恢恠怪懦莫能比擬古人云不到散花隴不知天下有奇石良然由隴循鳥道曆二阜有巨石森然昂首藏尾夭矯如龍名擾龍石一松破石以孕鼓鬣怒撐上透石頂凌空飛舞曰擾龍松再上五里爲獅子嶺嶺路險峻壤磴欹砌砂石充塞近爲汪居士蟾清所修有級可拾矣陟嶺則四顧曠朗峯巒如畫如建章宮殿周迴十數恐米元暉之萬峯積雨李咸熙之萬松蕭寺未能彷彿萬一也下嶺卽獅子峯十數武右折而登清涼台橫往而入清涼頂直下而抵獅子林惟游者自擇焉可也至若凸兀者曰駝背峯端立者曰觀音峯皆在獅子峯之東北須上嶺時可極目及之

焦村陳家至翠微寺八里

焦村陳家太平縣之西鄉也距城五十里距焦村三里比鄰而居皆爲望族由陳家出天祿亭經攔路坊直行五里爲栗溪坦卽上湯嶺之徑也東行過石橋沿河而上

綠水空明游鱗可數磷磷衆石响答潺湲四里至麻衣塔塔爲麻衣和尚所建玲瓏纖秀亦自怡情過塔則高磴短磴拾級而上曲折層升有亭孤立曰方來亭汪文節曾題翼然二字緣溪而行清冷幽邃已隔塵雜有木石兩橫如彩虹雙落橋下爲青牛溪相傳昔人見青牛形色瑰異欲牽逐之入水不見溪上有馬頭石昂首若嘶過橋則巒迴路折依山北轉四里而翠微寺在焉寺當峯下以峯得名寺後迤邐而上可五里許有西峯堂堂側一小石豎立大石上不相連屬如飛將軍從天而降者又上溪旁石上有龍盤虎踞四字乃焦居士元振避粵亂隱居時所題再上爲翠微峯宛如雲中逸鶴困瀚蟠龍雅不欲與羣互爭雄長者峯麓有翠微洞又曰麻衣洞洞側又有馬頭石如前狀昔年由此可達獅子峯今則白雲封谷丸泥塞關滿山荆棘久無問津者矣

栗溪坦至慈光寺山門三十里

栗溪坦在太平之西鄉也章姓乃陳村之附戶距城五十五里前往五里曰伏牛嶺嶺麓古有竹林庵越嶺南下石上碧泓泓疊如砌其聲潺潺俗稱油煎豆付既下又

上道路曲折一里至方源橋前往翹首西望見有若人若獸若魚若龜若蠅飛若狐攫若筍之叢生若鶴之獨立錯出雜陳目不暇給三里至甜珠嶺一登嶺巔而弔橋庵在望焉一里過壽延橋經碁盤石石如几相傳有仙人戲奕於此今則陳居士兆軒設路燈於其上庵後有羅漢趺坐東鳴有石如人立振衣天際卽石人峯下有駕鶴洞昔浮丘公駕鶴處也雙橋橫駕彩落虹飛故曰弔橋庵在橋畔因以名之近韓道人易爲淨心庵爲黃山西入之路庵前設有茶室因過此二十里無人煙游者須於此飽餐而整履焉庵南山巔有天星洞相傳有天星穿此而過左折入山五里昔有白雲庵由庵後踰海棠壩循指象處二十五里可達天海平天砭庵圯後行踪久絕無復有問津者矣前行越續古橋上嶺百步間昂首東望突有石人立於峯巔亦卽石人峯之重見也路賒級峻二里半有亭憩息前行數步迎面左坳者爲湯嶺關右坳者爲雲門峯此處爲雲門峯之北脚也弔橋庵南望天星洞卽在此路之西岡近視尤爲楚楚里許過乾坑橋越西流河再一里半有航海庵舊址旁有亭翼之上下道路昔爲太平陳居士珊瑞所修近爲其五世孫少舟復承祖志又修之又五里

逾海雲亭而達湯嶺關關爲涇陽張中丞芾所建關之北壁有甘泉一縷大旱不竭以爲游人止渴飲之清冽異常道中之山嵐如拭光澤眩人東有雲際峯藏雲洞西有雲門峯笠人石浮丘峯在雲門之西白雲如濤銀潮洶沸沿崖紅樹錯出若錦下湯嶺乃南幹正脈繞此而出自雲門峯至桃花峯古劃八溝每溝秀異若經鬼斧神斤曰石筍曰天眼曰觀音掃淨曰老僧打坐沿途南望一一畢呈五里至橫坑庵庵遭兵燹有亭可以休息又里許下有巨石中裂如切曰劍石前往歷長短梯路若梯狀是以名之再一里至鳴絃泉俗呼珍珠挂門簾是也左有醉石昔李供奉飲此遠石歡呼故名石上題句則嘉靖時所刻也泉水淙淙從石壁下爲洗盃泉下有石陽白陰黝如積雪狀故曰停雪石前去則烏鴉伏地林鶯打兔又有飛來石緊淺盃羅列當前羅漢點燈觀音坐蓮遙遙相對而張公背張婆諸景須將至虎頭橋回首而望卽在目矣沿白雲溪二里至虎頭橋橋水自蓮花溝而下由此攀藤捫葛陟壁跨巉可達蓮花峯然徑危道險行者絕少越橋有石如虎昂首咆哮狀若搏噬曰虎頭巖左巖又名山君似不如虎頭爲質實循途前往於山則有獅子洞於水則有聖水

泉藥銚藥瓢咸在溪中幽曲澗頗饒致趣白雲溪叢石怒撐交加澗曲沿溪桃李梨杏搖曳繽紛蘭茝芷蕙縹綠紅嫣殊有應接不暇之態此處距慈光寺山門相距一里若從湯口來游者須遶道而流攬之

黃山風俗

一黃山寺院虔奉菩薩分爲四派 文殊院以南慈光寺紫雲庵諸刹皆普門和尚後裔以文殊爲主座 文殊院以北獅子林雲谷寺神仙洞諸刹皆一乘和尚後裔以觀音爲主座 翠微寺乃麻衣祖師之後敬地藏爲主座 松谷庵卽松谷祖師開創敬松谷爲主座

一凡鳴鑼香客每年七月起至十月止湯嶺道上每日不斷口唸九華齊雲黃山文殊菩薩南無阿彌陀佛聲隨鑼起沿途不息

一朝山香客有結會鳴鑼者有獨挑香擔者由九華山來向齊雲山去此慣例也道經太平焦村上釣橋庵越湯嶺至黃山敬佛非慈光寺卽紫雲庵間至文殊院他庵則不去故慈光寺紫雲庵兩處香火較盛民國十四年秋有香客三班由太平

甘棠至輔村越松谷庵上獅子峯繞文殊院抵慈光寺捨湯嶺而由山北穿至山南歷古以來是今日爲始因山中險道平治故也

一鳴鑼香客蘇浙徽寧俱有之每班人數不一至山房伙照舊賬每人每日百文當此米貴物昂何能敷衍惟望寫燈油捐以資補助供應香客饌蔬果點各有定例如或少之必相爭論何朝山禮佛者亦如此刻薄耶

一昔年慈光紫雲兩庵僧人在山君岩下分路處強爭接客後經中人調解公立一碑上鐫左往慈光寺右往紫雲庵聽客自由以息爭端且公立議約限制接客地點左以小補橋爲止右以山君岩爲止如有越限則照議認罰可見兩庵爭衡之劇烈近年紫雲庵併歸慈光寺住持脫塵一人經理合而爲一此後香客可信足所之矣

一慈光紫雲兩庵最仗黟縣香客次祁門蘇杭休歙旌太又次之惟黟縣仍有一種齋婆輪班來庵做善事薦亡破血湖延和尚六八人鑼鼓喧天扮文裝武如演戲狀一晝夜經錢念餘元雜化亦念元左右禪門而用應夫規則雖云風俗所致亦

異聞也

一翠微寺每年夏曆七月晦日爲地藏王聖誕廟祝須先期預備茶點麵飯屆期士女如雲焚香求籤繹絡不絕寺中尤形擁擠捐助功德每人祇燈油一二斤銅鈔數十枚而已

一神仙洞每年夏曆二月六月九月十九爲觀音誕日香客雲集惟六月十九日尤爲顯聖轎馬塞途十八夜卽焚膏達旦香煙瀾漫洞口矣

一松谷庵松谷祖師爲山下溝村李姓土主十年一次迎接下山儀仗威嚴頗爲熱鬧

一婦女香客最信裝金塑像據云塑諸天來世得良人塑羅漢來世得才郎山僧藉此婪錢亦一種之風俗也

一黃山僧人送香客遊客禮物以木蓮果放光石雲霧茶黃連雲霧草諸類遇貴客則加贈青筍石衣香葦野白朮青松以上諸物詳載於異產內

一黃山皆峭壁石田不可畊者明初太平令柳世榮歙縣令張濤據實申豁故少賦

稅山中寺院爲十方所建無山主之名稱

一文殊院慈光寺紫雲庵雲谷寺等處近歙縣北鄉之湯口苦竹溪 釣橋庵翠微寺等處近太平西鄉之陳家焦村 獅子峯松谷庵等處近太平西南鄉之輔村溝饒村 神仙洞福固寺等處近太平南鄉之巷里三口 以上附近村莊皆視爲香火庵此等習慣由來已久有事各鳴該處之紳耆處之

一慈光雲谷翠微松谷四寺爲黃山四大叢林清咸豐以前皆輪流傳戒不下名山氣象紫雲庵於光緒四年亦曾接法開期一次

一清康熙初間黃山宗風一振慈光住持弘眉纂修山志翠微寺超綱亦修寺志俱剖晰行世二僧才學皆邁衆加之勝朝遺老咸集於此著作之富冠絕一時

一黃山各庵菩薩印皆木質惟慈光寺有玉印一顆上鐫文殊寶印四字寺僧什襲藏之平常以木質代之玉印不輕用也

一黃山相傳爲軒轅得道之所近數百年未聞有道人發展占之者多僧人也

一黃山寺院附近皆產茶筍惟文殊院四處石壁獅子峯寒氣太重故無之

一山下四鄉茶葉惟湯口所產最貴山中之桃花峯湯池墘釣橋庵芙蓉嶺丞相源所出較湯口尤貴價加百分之三十可見山上山下大有分別

一慈光寺僧人每年正月初六日須下山至湯口程祠拈香禮拜程姓村長於初八日上山向佛前回拜風雨無間追原其故因明萬曆丙午勅賜七層四面毘盧滲金佛塔年終抵湯口被雪所阻安於其祠逾年昇上是年僧人於初六日前去拈香以後遂成慣例

一黃山慈光寺每年除夕以赤豆白米煮之先供神前然後盛兩盆擺在殿前以饗神鴉此爲數百年前祖規所遺者其神鴉前三日卽飛繞大殿前後歷年不爽亦一異也

一黃山神鴉由來已久寺院有貴客至神鴉卽先期來鳴屢試皆驗又山僧云神前燈火夜深忽明亮必有客至又鍋門燒火之柴忽笑忽爆亦一客到之先兆也

一黃山東南所屬歙縣之湯口苦竹溪岡村芳村楊村至黃山谷口一帶通稱黃山源因近黃山也黃山源田少山多居民以芭蘆爲正糧若米須由太平旌德兩縣

接濟

一黃山源出產以茶爲大宗蘿菔次之竹筍又次之

一黃山源居民好酒又不產酒仰給太平焦村雙溪鎮謂之溪酒故湯嶺酒擔每日不斷

一黃山源種山肥料全仗桐枯青枯菜枯亦購自太平譚家橋與雙溪鎮之油坊

一黃山西北屬太平縣山多田亦多出產以稻米爲大宗茶葉亦復不少又甘棠雙溪二鎮所琢之紙傘最良因昔年有客過洞庭湖幾遭風災得太平傘以救之故來往香客無不買之甚至一人買數十柄者亦一土產也

一黃山寺院皆吃太平所產之米卽有自種芭蘆者亦聊以備不虞而已

一黃山寺院寒冬無事以芭蘆磨粉調餬做粿當餐芭蘆餬粿較米便宜價少七折

一天將雨黃山有三處可預知之 一全山無雲霧若天都峯之東鉢盂峯頂獨有之明日必雨 二桃花峯脰之水簾洞冬季冰結不解一聞冰裂聲明日必雨

三翠微峯傍之探水石如一見石長明日必雨此乃屢試屢驗應如桴鼓

一黃山口音不一山僧某籍卽操某音故黃山無統一之音山之東南黃山源與山之西北焦村輔村口音大有區別惟庵中所僱之勞工皆安廬人方言不難辨

一全山皆石壁惟獅子林庵前係土山昔年有松樹一塢如虬如龍如人如鶴疎密糾曲古秀無倫游客至此莫不嘆爲奇觀民國癸亥秋山僧失火延燒豈植物之巧者亦爲化物所忌耶

一黃山僧人自咸同兵燹以至清末共五十餘年寥落不堪言狀朝來夕去視爲傳舍民國丙辰以來幸江蘇李法周居士至獅子林誦拜妙法蓮華經並提倡佛教平治山徑後得法空建造清涼頂脫塵繼主慈光寺興雲退居松谷庵心堅隱於東古寺明光關築半山寺宗教創興五台庵是以黃山有漸見中興之象

中華民國十八年六月初版

版權所有
翻印必究

黃山指南全書一冊

(定價洋一元四角)

編著者 黃海散人

代印者 商務印書館

代售處 商務印書館

分售處 商務印書館

6

44 1038

11